

**Laipstail**  
**CPL Grup sapotim**  
**Meri Seif Ples...**  
**- Pes 16 na 17**

**Bisnis**  
**Manmeri kisim skul**  
**long lukautim hani**  
**bi...- Pes 21**

## Soim kala nau...

SOIM KALA STRET:  
 Tru tumas, ol kala bi-  
 long ol asples pisin bi-  
 long yumi Papua  
 Niugini i save stail  
 moa. Na pisin bilong  
 bikpela kumul bilong  
 yumi, em nau ol i  
 penim antap long tu-  
 pela traipela pisin ain,  
 ol i sanapim long raun-  
 about long 4mail long  
 Mosbi siti. Dispela  
 piksa, em ol sumatin i  
 lain long kamap pen  
 man bilong Artline i  
 save gut tru long  
 penim bai em i makim  
 stret kala bilong  
 kumul. *Poto na stori:*  
 Nicky Bernard



# Nogat inap dokta long glasim hevi bilong bia

### James Kila i raitim

PAPUA Niugini i nogat inap mansave long stretim ol sikmanmeri husat het bilong ol i paul o long-long taim ol i dring bia na smuk mariwana tumas.

Ekting Dairekta bilong Laloki Paikaiatrik haus sik, Dokta Ludwig Nanawar, i bin tokaut long dispela long Tunde insait long Alkohol Abius Simposium long Institiut ov Pablik Edministresin (IPA) long Mosbi em Ofis bilong Sif Seketeri bilong Gavman

na Loa na Jastis Sekta Sekretariat i kamapim.

Dokta Nanawar i tok dispela em bikpela salens tru long kantri bilong yumi bikos nogat planti lain sumatin long yunivesiti i go insait long stadi long dispela sik bilong man i go het long-long o het paul na mekim nabaut.

Em i tokaut tu olsem planti ol dispela lain husat i save go long Laloki wantaim sik long-long o het-paul em ol dispela lain husat i simuk mariwana na

putim alkohol o bia i go wantaim.

"Planti lain husat i save kisim sik long-long o het-paul em lain husat i save simuk mariwana na putim bia wantaim," Dokta Nanawar i tok.

Narapela bikpela samt-ing em i tokaut long en em moa long 70 pesen bilong ol dispela lain husat i save go long Laloki Paikaiatrik Haus sik em ol yut o kris-mas bilong ol i stat long 15 i go 18 krismas.

*I go moa long pes 3*

**FRI**  
**bihain**  
**long**  
**2pela**  
**SMS**

Salim  
 tupela sms.  
 kisim 18  
 Fri sms



Kisim 20 teks  
 long prais lo tupela  
 teks tasol!

Sapos yu salim  
 tupela teks namel  
 long 7am monin  
 na 9:59pm nait bai  
 yu kisim 18 teks fri  
 behain long em.



Digicel Tems na Kondisen bai stap.

## GLOBE MACKEREL

*More Easy  
 More Tasty  
 More Energy*



**GLOBE** ....the perfect choice

# Polis bai bung long Hagen

## Bustin Anzu i raitim

**OL bikman na meri bilong Royal Papua Niugini Konstabuleri (RPNGC) i bung long bik taun Mount Hagen long Westen Hailans provins long dispela wik long mekim plen or redi bilong 2012 Nesinol Ilekseen.**

Dispela miting long stat bilong aste ("Trinde) bai pinis long Fraide na bai pulim olgeta bik bos bilong polis long Het opis, ol divisen komanda, ol Provinsel polis komanda na ol dairekta, long plenim ron bilong namba 9 nesenelekseen.

Dispela tripela de bung, aninit long dispela het tok: "Long laik bilong ol pipel" bai toktok long autsait bai ol i plenim dispela bikpela ilekseen oporesen.

Ekting polis Komisina Tony Wagambie na namba tu bilong em na bos bilong oporesen Fred Yakasa, i tok dispela ilekseen em long tupela mak. Wanpela em long kamapim wanpela pri-ilekseen oporesen long namel bilong dispela yia na narapela em long painim aut wanem samting ol i gat na putim wanpela sabmisen long kisim helpim long nesenelekseen.



**OL BIKMAN:** Ol dispela bikman polis, Superintendent Augustine Wampe (PPC Isten Hailans), ACP Thomas Eluh (Autonomous Region of Bougainville) na Sif Superintendent Peter Guinness (PPC Morobe) bai soim pes long dispela miting. Ol i bin soim pes long Lae long PPC Konferens las yia.



**OL BOSS:** Ekting Polis Komisina Anthony Wagambie (l) na Diputi Polis Komisina (Administresen) Tom Kulunga i bin bung long PPC Konferens long Lae long las yia. Tupela bai mekim wankain long bung bilong plenim 2012 ilekseen long dispela wik long Mount Hagen.

man.

Yakasa i tok long Epril na Me, ol bai kamapim wanpela pri-ilekseen oporesen. Em long painim aut wanem em ol trabel eria o ples na painim aut o kisim ripot long wanem ol ples em bai no gutpela long kamapim ilekseen.

Intenol Sekyuriti Minista Mark Maipakai bai opim dispela bung na Gavana bilong Westen Hailans, James Olga, bai pasim.

Ilektoral Komisen, ami na narapela ol stekolda husat save givim han long kain ilekseen bai givim toktok tu long dispela miting.

Tupela nupela provins Hela na Jiwaka bai kamap long dispela miting tu.

Tari Pori MP na Minista bilong Edukesen James Marabe, bai makim Hela na olpela Primia bilong Westen Hailans na nau, man i go pas long Jiwaka Philip Kapal bai makim nupela provins bilong em long dispela taim.

Wankain taim tu, bos bilong polis long dispela taim bai makim tupela nupela Provinsel polis komanda bilong Hela na Jiwaka.

# Edukesen nau i no samting bilong olgeta famili

I GAT bikpela wari long nau long PNG olsem edukesen nau i kamap olsem em i no moa samting bilong olgeta famili, long wanem long kos bilong baim skul fi nau i wok long go antap moa.

Taim kos bilong edukesen i wok long go antap olgeta yia, i gat ol ripot i wok long kamap na i bin tok olsem stendet o level bilong lainim ol sumatin i no gutpela moa long Papua Niugini, we ol teks buk i olpela tumas, ol bilding long ol skul i no luk gutpela, na planti taim ol tisa i no save kamap long skulim ol pikinini.

Dokta Alphonse Gelu, bilong PNG Nesenelekseen Riset Institut, i bin tok dispela hevi nau i stat long i go nogut olgeta.

Em i tok i tru taim gavman i wok long strongim tingting olsem ol pikinini i mas i go long skul, tasol dispela nau i kamap olsem em i dia tumas long planti ol papamama.

# Ol wok painim yet wanpela pailot bilong Australia

OL wok painim long traime painim wanpela pailot bilong Australia husat i bin lus stat long taim helikopta bilong en i bin pundaun bagarap long not kos bilong PNG i bin pinis aste (Trinde).

Em i 48 awa pinis bihain long stat long taim dispela helikopta pailot, em Lloyd Lester, i plai long en i bin pundaun bagarap long solwara bilong Bismark klostu long Manus ailan.

Sampela ol pipia o hap hap bilong dispela helikopta, em pipel i bin lukim i drip antap long solwara long hap olsem saut bilong Manus, tasol ol i no nap lukim dispela pailot bilong Kwinslen (Queensland), krismas bilong em 57.

Kampani em i wok long en, Pacific Helicopters, i wok long ting olsem Mista Lester i mas swim i go long wanpela ailan klostu long ples em i bungim birua long en.

Tasol mausman bilong kampani i bin tok ol wok painim bai pinis bihain long ol i toktok aste, wantaim sampela pipel em ol i bin lukim dispela birua i bin kamap long Baluan Ailan long saut bilong Manus.

Na dispela mausman i go het na tok em i eli yet long mekim ol toktok long wanem samting i bin kamapim dispela helikopta long go daun long solwara na bagarap.

# Kerevat Nesenelekseen Hai nogat moa sumatin

## Michael Novingu i raitim

KEREVAT Nesenelekseen Hai skul long ls Nu Briten provins bai no inap kisim ol sumatin long skul long 2011.

Skul i no moa gutpela bikos ol haus skul, haus bilong ol tisa, pip bilong wara i bruk, na ol arapela samting long skul i bagarap, na i no gutpela long ol sumatin tisa i yusim long lainim ol samting long skul.

Tenpela tisa long Kerevat Ne-

senel Hai skul i tok orait long skulim namba wan Gret 11 bilong Malaguna Teknikal Sekonderi Skul long 2011.

Ol tisa bilong Kerevat Nesenelekseen Hai skul i kamap long Malaguna Teknikal Sekonderi skul las wik Fraide long luksave long ol wantaim atoriti bilong Malaguna Teknikal Sekonderi skul, Bosman bilong NGI stendet na gaidens, Thomas Kamtel na Andrew Aru.

Ol i tisa long Kerevat Nesenelekseen Hai skul bai kisim pe long mak bi-

long ol long Kerevat Nesenelekseen Hai skul, tasol ol bai tisa long Malaguna Teknikal Sekonderi skul.

Mista Kamtel i salensim ol tisa long wok bung wantaim long soim olsem ol i ken mekim gut wok long skulim ol sumatin long Malaguna Teknikal Sekonderi skul inap long 2012.

Kamtel i tok gavman i spendim planti mani long stretim Malaguna Teknikal Sekonderi Skul, olsem na ol tisa i mas wok hat long apim mak bilong

skul long kamap gut.

Malaguna Teknikal Sekonderi skul em planti manmeri i papa long en, ol tisa i mas kam long wok long taim, soim gutpela pasin long wokim wok bilong ol, na ol i mas karim kaikai long wanem ol manmeri bod ov dairektas bilong skul i putim was long wok bilong ol, Kamtel i tok.

Em i tok wok bilong stretim Kerevat Nesenelekseen Hai Skul bai stat long dispela wik.

**OXFORD, TOK PISIN INGLIS DIKSENERI**

Katim, na pulimnapim oda fom daunblo na selim i kam long Wantok Nuspepa sepos yu laik baim dispela Oxford Papua Niugini Dikseneri (Dictionary) we Wantok na Oxford i wok bung wantaim long kamapim: Dispela Luuk i ken helpim yu lanim Tok Pisin i go long Ingles, o Ingles i go long Tok Pisin. Harlap na kisim wanpela bilong ol dispela gutpela buk we inap strongim Tok Pisin bilong yu.


**ORDER FORM**

FILE	ISBN	PRIC	QTY	TOTAL
Eng Tok Pisin English Dictionary	9780195531129	103.00		

Address: Word Publishing Company Ltd  
 151-153 South Pacific Way, Port Moresby, PNG  
 Tel: (675) 325 2579  
 Fax: (675) 325 2579

**FAX BACK TO: (675) 325 2579**

**TOK SORI**




I go long meri, pikinini na ol famili bilong **William Kotson** long dai bilong em long dispela mun Febueri 2011.

William i bin wok wantaim Word Publishing long yia 1984 i go Septemba 1995 olsem Sekulesen na Disrtibiusen menesa.

Bikpela sori na Papa God bai givim belisi long yupela long dispela taim bilong hevi.

**Kisim gutpela Malolo oltaim!**

**Bod, Menesmen na ol wokmanmeri bilong Word Publishing Company Limited**



# Gavman mas makim komiti long glasim bia hevi

James Kila i raitim

BIKPELA askim nau i go long gavman long kirapim wanpela wok komiti o wanpela bodi long lukluk i go insait long hevi alkohol (dring bia) save kamapim insait long kantri na wanem rot long stopim na daunim dispela ol hevi.

Dispela em wanpela bikpela rekomendesin o askim we i bin kamap insait long namba wan Alkohol Abius Simpsum we i bin kamap long Institiut ov Pablik Edministresin (IPA) long Mosbi stat long Mande na pinis long aste.

Simposium i askim olsem dispela wok komiti o bodi we i kamap i mas gat luksave i kam long Nesenel Eksekutiv Kaunsil aninit long lo. Dispela bodi mas gat ol komiti memba i kam long ol provinsal gavman, ol lain egensi olsem

polis, welfea, NGO, bisnis haus, Intenol Revenu Komisin. Moa long en tu dispela bodi mas gat ol lain saveman long karimaut wok painimaut o risets i go insait long ol hevi i kamap taim ol pipel i kisim alkohol na wanem ol gutpela rot long daunim ol dispela hevi.

Bihain long dispela 3-de kibung long Mosbi, ol lain stekholda long sait bilong gavman bodi, bisnis haus, sios na NGO i bin mekim grup miting na i bin kamap wantaim sampela ol rekomendesin we wanpela task fos komiti.

Mausman bilong ol gavman sekta grup i tokaut long rekomendesin bilong ol olsem alkohol (pasin bilong dring) em bai stap yet long kantri bikos em i kamap olsem kalsa bilong yumi pinis. Ol pipel save kisim bia long ol sosel bung na tut aim bilong amamas na kain olsem. Tasol gavman i mas kamap wantaim sampela kain rot long kontrolim pasin bilong ol pipel i kisim bia, kontrolim tred o rot bilong salim bia na tu.

Mausman ya, Wilson Thompson i tok grup bilong gavman sekta i tok

strong olsem dispela ol rekomendesin ol i givim em gavman mas lukluk i go insait long en na mekim samting. Em noken kamap olsem "Gan Ripot" we i stap nating nau long Waigani bihain long miting i kamap sampela yia i go pinis.

Ol lain long bisnis sekta i tok olsem gavman i mas strongim lika lo na regulesin.

Ol i askim tu olsem moa edukesen aweanes i mas kamap long gutpela sait bilong kisim alkohol na wanem ol nogut sait bi-

long kisim alkohol.

Mausman bilong ol bisnis komyuniti, Reg Monagi, husat i wok olsem Komyuniti Afes menesa bilong SP Breweri, i tok wok i mas kamap kwik taim tasol bihain long dispela symposium.

Grup em i stap long en i laikim olsem wanpela task fos i mas kamap long glasim ol rekomendesin wantaim Tem ov Referens (TOR) o wanem wok long mekim taim ol i kisim ol infomesin i kam long dispela symposium.

## Tingim ol pikinini long bihain taim na kamapim loa

WANEM ol loa long daunim hevi bilong alkohol o bia insait long komyuniti long PNG i mas gat strongpela tingting long ol pikinini bilong yumi long bihain taim.

Dispela em wanpela strongpela toktok ol lain bilong Sios na non-gavman ogenaesisin i mekim insait long ol rekomendesin bilong ol long namba wan Simposium long daunim

hevi bilong kisim alkohol we i kamap long Mosbi.

Ol i tokaut olsem alkohol o pasin bilong dring bia i save kamapim moa sosel hevi insait long komyuniti. Taim alkohol i kontrolim ol man planti taim i save gat hevi long ol famili haus, skul bilong pikinini na tu hevi long komyuniti. Na taim wanpela papa i yusim moa mani long baim bia em i ken lus tingting long raits

bilong pikinini long kisim edukesen, gutpela sindaun na tu famili sampela taim i save bruk.

Josephine Mill bilong Save The Children, wanpela ogenaesisin we i wok wantaim ol pikinini na komyuniti long Isten Hailans, i tok olsem moa wok i mas kamap long dispela lo gavman i kamapim ol i kolim "Lukautim Pikinini Ekt".

Em i tok olgeta level bilong gavman mas lukluk moa i go insait long dispela ekt o lo long save gut long raits bilong ol pikinini.

Narapela meri, Naomi Yupae bilong Isten Hailans Famili Vois, i tok olsem moa aweanes i mas kamap na tu gavman i mas sapatim ol liklik NGO long go aut long bringim aweanes long ol komyuniti long save hevi alkohol i ken kamapim na

wanem rot long stretim.

Mis Yupae i tok tu olsem long bihain taim em i moa gutpela long bringim ol lain husat i bin stap insait long kain hevi olsem alkohol long stap long simposium long givim stori bilong ol. Ol i ken stap olsem rol model na wanem toktok ol i givim em tru tok na ol lain bilong kamapim polisi i ken harim gut na mekim stretpela loa.

## Nogat inap dokta long glasim hevi bilong bia...

I kam long pes 1

Dokta Nanawar i tokaut tu olsem pasin bilong ol lain i yusim spak-brus wantaim alkohol o bia i wok long mekim na planti lain i wok long go long haus sik bilong ol lain long-long o het paul long Laloki.

Moa long en tu, dispela ol pasin i wok long mekim na planti lain i save bikhet na i laik kamapim trabel, sampela i laik kilim ol yet i dai, na tu i kisim bikpela sik.

Dokta Nanawar i tok dispela i bikpela salens tru long ol wok lain o medikal saveman long save gut tru husat i gat sik long-long ol het-paul na rot long menesim ol na lukautim ol.

# Haus sik save lusim bikpela mani long stretim ol spak lain i bungim hevi – Dokta

James Kila i raitim

**MANI-mak na risos ol pablik hausik save yusim long stretim wanpela man husat i dring bia na painim birua o kisim bagarap em antap moa long lain husat i kisim sik olsem malaria na ol narapela sik long bodi.**

Ol pablik hausik i save westim bikpela mani na risos long stretim ol dispela lain husat i kisim bagarap bihain long ol i dring bia na spak na bungim hevi long rot.

Dairekta bilong Medikal Sevises long Mt Hagen Jeneral Hausik, Dokta Michael Dokup, i tokaut long dispela long Tunde insait long namba wan Simposium o bikpela miting we i lukluk i go insait long hevi alkohol i save kamapim long kantri na wanem rot long helpim na daunim.

Dokta Dokup i wok long bikpela riferal hausik long Mt Hagen, we i save lukautim ol pipel i kam long Westen Hailans, Sauten Hailans, Enga na tu long Simbu provins we namba i stap olsem 2.5 milien pipel olgeta em i sevim.

Dispela symposium long Mosbi



**BIRUA:** Planti o bikpela birua long rot long ol taun na haiwe, em i save kamap taim ol man i dring bia na spak na draivim kar. *Poto: Nicky Bernard*

em ofis bilong Sif Seketeri wantaim Lo na Jastis Sekta Sekretariat (LJSS) i kamapim em long kisim tingting bilong ol stekholda long save gut o painim rot long daunim hevi em alkohol i kamapim na wanem gutpela plen ol i ken kamapim long helpim sosaiti na jeneral komyuniti.

Dispela symposium long Mosbi i lukim ol wanpela saveman bilong Intanesenel Senta bilong Alkohol Polisi, Dokta Brett Bivans i givim toktok na tu ol sinia gavman dipatmen het olsem Seketeri bilong Helt, Dokta Clement Malau, Ekting Seke-

teri bilong Edukesin, Dokta Joseph Pagelio, ol lain bilong sios olsem Asbisop bilong Mosbi, John Ribat, sif eksekutiv bilong Motor Vehicle Insurance Limited (MVIL), Dokta John Mua na ol narapela bikman.

Ol narapela lain olsem ol NGO na komyuniti-bes ogenaesisin i givim toktok tu long wanem progrem ol i save wokim long helpim ol pipel husat i bungim hevi bilong alkohol abius.

Narapela bikpela samting Dokta Dokup i tokim symposium em olsem i mas gat riviu o senis i kamap long

ol rejista buk ol lain i karim i go long hausik long glasim gut olsem ol lain i kisim sik long alkohol i bungim hevi long alkohol na ol i go long hausik.

Dispela i save givim hevi na hatwok tu long sait bilong medikal wok lain na risos long hausik.

Dokta Dokup i tok em i save kos samting olsem K2,000 i go K15,000 long givim marasin na stretim ol lain husat i kisim bagarap long bodi bilong ol taim ol i dring spak na bungim birua na go stap long hausik. Na dispela i save givim moa hevi tu long hausik sapos ol lain ya i stap longpela taim long hausik.

Em i tok olsem mak tru long lukautim wanpela man o meri long hausik olsem Mt Hagen em K425 long wanpela wik.

Em i tok wan kain hevi hausik em i wok long en i bungim em ol narapela bikpela hausik long kantri tu i save bungim taim i kisim moa lain husat i dring spak na bungim birua na go long haus sik long kisim marasin.

**Nestlé MILO**

**KAMAPIM CHAMPION BLO YU!**

THE ENERGY FOOD/DRINK

Nestlé MILO Actigen-E 40g NET

Nestlé MILO Actigen-E 150g NET

Nestlé MILO Actigen-E 200g NET

# “Lukautim laip!” - Malau

## ...nogat loa long pasim ol strongpela marasin

**WAS o wok bilong abrusim hevi i kamap long bodi bikos long ol strongpela marasin olsem sainaid (cyanide), kobalt na mekuri i bikpela samting.**

Dispela long wanem sapos dispela ol marasin i pas long skin o go insait long bodi bilong man o meri i ken bagarapim ol hap bilong em o nogat i ken kisim man i dai, Helt Seketari, Dokta Clement Malau i tok.

Na em gutpela Helt Dipatmen i givim kain tok lukaut long stap bilong dispela ol marasin.

Tasol hevi nau i stap long loa, i nogat loa i stap bilong banisim ol manmeri sapos kain marasin i bagarapim ol.

Nau yet planti ol kampani, moa long ol maining, i wok long yusim dispela ol marasin.

Na sapos hevi i kamap, i nogat gutpela loa i stap bilong kotim ol kampani.

O i nogat loa i stap bilong tokim ol kampani long ol rot ol i ken bihainim long yusim dispela ol strongpela marasin long wok bilong ol.

Long dispela as Dokta Malau i tok Helt Dipatmen i toktok wantaim Dipatmen bilong Maining na Petroleum na Envairenmen na Konsevesen long ol i bung wantaim na toktok long wanpela loa.

Em i tok ol i ken toktok long baim bilong dispela ol marasin we i gutpela long maining na petroleum wok na strongim ikonomi tasol long wankain taim i bihainim na yusim ol rot we bagarap i no ken kamap long laip bilong ol man na bus graun, wara na solwara bilong ol.

Em i tok ol toktok i kamap pinis long wok bung i kamap namel long Pablik Helt Skul long Harvard Yunivesiti,

Amerika na Helt Dipatmen.

Wanpela liklik bung i kamap namel long dispela ol grup long Mosbi long las wik.

Tasol bipo long kain tingting i kamap, Amerika na Australia Nuklia Saiens na Teknoloji Oganaisesen (ANSTO) bihainim Global Trit Ridaksen Inisitiv (GTRI) progrem stat long 2007 i mekim wok painim long wok bilong kobalt long Angaun Memoriel Haus sik long Lae.

Dispela progrem bai pinis long narapela yia, 2012.

Dokta Malau i tok em i wok bilong Helt Dipatmen long lukim hamas dispela ol strongpela marasin i kam insait long kantri.

Ol saveman i ken yusim sampela bilong dispela ol marasin long stretim sik kensa.

“Kobelt i nuklia enejis sos we planti bilong dis-

pela i stap long Lae long stretim sik kensa.

“Na wok bilong lukautim na bihainim ol rot long yusim dispela marasin i bikpela wok bilong dipatmen.

“Dispela i nupela taim mipela i go insait long em.

“As kantri i odaim bikpela mak bilong dispela ol marasin i kam insait long kantri em long stretim ol sik olsem kensa wok i kamap long maining na petroleum indastri.

“Tasol sapos i kam long bikpela namba o liklik, em wok bilong dipatmen long lukim olsem ol oganaisesen i yusim gut dispela ol marasin,” Dokta Malau i tok.

Em i tok inap long nau, PNG bihainim tingting em i gat wantaim Intanesenel Atomik na Eneji Ejenji (IAEA), i mas kamapim ol rot bilong yusim dispela ol marasin.

# Ol Kumul pilaia bai bringim aut rot sefti aweanes



**SEFTI AWEANES:** MVIL Menesing Dairekta, Dokta John Mua i sekim rejstresin bilong NRL PMV Draiva Kompetisen bilong 2011. *Poto: Nicky Bernard*

OL TOKTOK bilong rot sefti em bikpela samting em yumi olgeta mas toktok oltaim long en.

Menesing Dairekta bilong Motor Vehicle Insurance Limited (MVIL), Dokta John Mua i tok olsem toktok bilong rot sefti mas kamap oltaim long helpim ol draiva long senisim ol pasin bilong ol long draiv gut na lukaut gut long sefti bilong ol pipel i yusim rot o stap antap long PMV.

MVIL long namba wan taim i bin kamapim pait o woa egensim pasin bilong draiv na kamapim birua long mun Oktoba 2009 insait long kempein we het-tok em “Rot Sefti: Em i no wanpela Gem”

I no long taim i go pinis, MVIL i tokaut olsem sampela nupela NRL stail ragbi pilaia bai stap olsem ol fran man long 2011 “Rot Sefti: Em i no wanpela Gem” kempein.

Ol dispela lain em Saut Sidni supasta Greg Inglis, stail pilaia bilong

PNG yet David Meade, Scott Prince, Willie Tonga, Sam Thaiday na Cameron Smith. Ol lain husat i bin stap long 2010 kempein em Kumuls kepten Paul Aiton na narapela prodak bilong PNG em Neville Costigan na tu Anthony Watmough na tu intanesenel long tupela spot em Wendell Sailor bai stap yet.

Tasol wanpela gutpela developmen em MVIL i bilip bai i helpim dispela aweanes long gro em rot sefti aweanes we ol lain pilaia bilong PNG yet mas promotim. MVIL i kisim tok-orait pinis long ol memba bilong PNG nesenel ragbi lig tim Kumuls long mekim dispel aweanes.

“Mipela laik yusim ol Kumuls bilong mipela long bringim aut aweanes insait long kantri na tu long ol provins, long ol skul we ol sumatin em ol draiva long bihain. Dispela bai mekim ol sumatin i kisim gutpela skul toktok i kam

long ol ragbi pilaia bilong mipela yet. Ol dispel lain i save stap wankain olsem ol na i save lukim wankain hevi i kamap long ol rot bilong yumi long kantri”

Sapos ol local pilaia bilong mipela i soim gutpela eksampel na askim ol lain long kantri long bihainim gutpela lo bilong rot sefti, ating ol lokal komyuniti bai save gut olsem ol lain Kumul pilaia i toktok long bel na lewa bilong ol stret na ol bai harim gut na bihainim wanem samting ol dispela lain i toktok long en.

Kumuls winga Michael Mark bai stap long sampela bilbod na tu long ol pepa long soim aweanes insait long dispela kempein.

“Mi laik lukim tu Paul Aiton, husat i go pas olsem kepten bilong PNG Kumuls long Foa Nesens long las yia tu long stap insait long dispela kempein.

## Ramu NiCo helpim sik sumatin bilong Raikos

Ramu NiCo Projek long Madang i sevim laip bilong wanpela 12-yia ol gret 7 sumatin bilong Gawa praimeri skul long longwe ples insait long Raikos Distrik bilong Madang provins i no long taim i go pinis.

Dispela pikinini bilong Ganglau viles we i stap autsait tasol long Ramu NiCo rifaineri em i gat sik long bodi ol i kolim hemoglobin we i lukim splin bilong em i solap bihain long em i kisim bikpela sik malaria. Dispela sik i bikpela insait long dispela eria.

Papa bilong dispela pikinini meri, Mou Bilang i tok olsem em i bin nogat mani long peim hausik fi bilong pikinini bilong em.

“Mi poret olsem pikinini meri bilong mi bai dai klostu olsem na

mi go kisim helpim long Ramu NiCo,” Mou Bilang i tok.

Ol wokman bilong Ramu NiCo Komyuniti Afes (CA) dipatmen long Basamuk rifaineri, George Wang wantaim Jacky Wang i helpim na givim K500 na ol kaikai em mani mak olsem K400 na bihain bringim dispela sik sumatin i go long Modilon Jeneral Hausik long Madang taun long kisim helpim.

George Wang i tok klia olsem dispela kain helpim o donesin ol i mekim em i autsait long memorandum ov agri-men (MOA) tasol ol i luk-save olsem turangu pikinini ya i nidim tru helpim bikos em i yangpela yet na moa samting i stap long laip bilong em long bihain olsem na ol i helpim em.

“Mipela i hariap tru long helpim papa bilong pikinini ya wantaim mani na gutpela nutrisen kaikai long Modilon hausik,” Mista Jacky Wang i tok.

George Wang wantaim Jacky Wang i bin go lukim Dinis long ples bilong em long Ganglau viles na i tokim em long lukautim gut helt bilong en na stadi strong long kamap gutpela meri long bihain taim.

Papa bilong Dinus em wanpela sif bilong Sibiya klen long Ganglau viles na em i tok amamas long Ramu NiCo long sevim laip bilong pikinini meri bilong em na em i tok ples bilong em bai sapatim projek long gohet na givim helpim long komyuniti.



Bank of Papua New Guinea

### Public Notice

ENGLISH

#### Application for a Gold Export Licence

To export gold from Papua New Guinea, a company must be granted a Gold Export Licence (GEL) by the Bank of Papua New Guinea (Central Bank). The GEL is valid for the time period specified on it from the date the Licence was granted.

Interested applicants can contact the Central Bank on phone **3227 214/215** for the licensing requirements and other information.

TOK PISIN

#### Aplikesen long Laisens bilong Salim Gol igo aut long Narapela Kantri

Kampani tasol mas kisim laisens long Benk bilong Papua Niugini bipo long salim gol igo aut long narapela kantri. Laisens bai soim mak bilong laip bilong em na bai stat long det bilong laisens.

Ol kampani husait i laik aplai long dispela laisens mas ringim Benk bilong Papua Niugini long fon namba **3227 214/215** na kisim moa toksave long infomesen yu mas salim ikam wantaim aplikesen.

MOTU

#### Golo Siai Tanobada Haida Ena Aplikesin

Golo hoihoilaia tanobada (country) haida dekenai ena maoro pepa (Licence), be kampani sibona ese do idia dogoa bona gaukara-laia. Bema kampani idia ura maoro pepa neganai, aplikesin fom (Application Form) abia mai Papua Niugini ena banika badana (Bank of Papua New Guinea) dekenai maoro idia henimu. Maoro pepa ena siahu horana be do ia hedinarai bona ia ena hematama horana danu.

Daika kampani ia ura maoro pepa neganai, boiboi mai Papua Niugini ena banika badana telephone numera **3227 214/215** bona heduru abia.

Marengo  
laik wokbung  
wantaim  
komyuniti

MARENGO, kampani i mekim wok maining long Yandera, Bundi long Madang Provins i gat laik long wokbung wantaim komyuniti long dispela hap na long ol hap i stap klostu long dispela ples.

Menesing Dairekta Les Emery i tok kampani i mekim olsem bikos em i laik lukim olsem wok i mas go het long mekim Yandera projek i kamap gutpela.

Long namel bilong 2008 komyuniti rilesens tim i stap long bes kem i bin kamapim sampela gutpela bilong Yandera komyuniti.

Ol i helpim ol lokol pilai olsem soka, ragbi na volibol.

Moa long dispela kampani i helpim komyuniti long kamapim na stretim ol samting bilong Yandera Komyuniti Skul.

Kampani i helpim tu long givim helt sevis we wanpela helt ekstensen opisa i save go raun long ples na sekim ol manmeri long sik, sua na kain sindaun bilong ples.

Na wantaim helpim bilong ol papagraun Marengo i kamapim wanpela asosiesen na konstitusen bilong em.

Wantaim kamap bilong asosiesen dispela bai helpim tu komyuniti long kam aninit long nem bilong dispela asosiesen na kisim ol samting long helpim sindaun bilong ples.

Tasol long olgeta dispela ol samting Marengo i save olsem i gat planti ol samting i stap yet long em bai helpim Yandera komyuniti.

# Oposisen no amamas K125 milion dinau mani

OPOSISEN i no amamas Papua Niugini gavman i makim Kokopo distrik long kisim K125 milion dinau mani.

Dispela mani em i kisim long Nasfan, oganaisesen we ol wokman bilong praivet sekta i save sevim mani bilong ol.

Em i kros long wanem mani em i kisim long nem bilong 6.5 milion manmeri bilong kantri tasol wanpela distrik tasol bai yusim dispela mani.


"Dispela i narapela liklik samting gen we Somare gavman i nogat strong long bekim gut.

"Dispela kain pasin i wankain long tok orait i kamap bilong kisim bilong K209 milion NCD Suris Projek we liklik lain manmeri tasol i kisim helpim long em na olgeta manmeri long Papua Niugini i nogat," tupela lidman bilong Oposisen, Bart Philemon na Dokta Puka Temu i tok.

Em i tok long sait bilong Suris projek, namel long 307,000 manmeri bilong NCD, 55,000 tasol i kisim sevis long dispela mani.

I olsem aninit long wan (1) pesen bilong 6.5 milion manmeri long PNG i kisim helpim long dispela mani.

Dispela dinau mani em PNG



**BART PHILEMON SKELIM GUT: Philemon**

gavman i kisim long JICA (Siapan Intanesenel Koporesen Ejensi) na gavman bai bekim dinau namel long 40-pela ten krismas.

"Wantaim populesen bilong Kokopo 20,262 manmeri, dispela i olsem 0.003 pesen bilong 6.5 milion manmeri bilong PNG husat bai hatwok nating long bekim dispela K125 milion dinau.

"Mi painim hat long save long rot gavman i yusim long kisim dispela mani long nem bilong liklik lain manmeri!

"Kokopo i no wanpela lis develop distrik olsem Telefomin, Karimui-Nomane, Jimi,



**SE PUKA TEMU BAGARAPIM PLEN: Se Puka**

Menyamy, Goilala, Obura-Wonenara, na Wosera-Gau.

"Dispela i bikpela asua tru na i go agens long tingting bilong Mama Loa.

"We stap ol gutpela tingting na Kristen pasin we Mama Loa i gat long em?"

"We stap dispela tingting bilong Mama Loa we i tok olgeta manmeri i kisim wankain luksave na kisim wankain sevis long ol samting kantri i gat na i mekim.

"Kokopo distrik wankain olsem ol arapela distrik i kisim pinis K18.5 milion.

"Na kisim bilong dispela mani i

min wan wan 88 arapela distrik bai kisim sea bilong K125 milion

"O sapos nogat dispela i narapela piksa bilong Somare gavman we i nogat strong bilong lukautim na menesim mani bilong kantri?"

"Hamas taim moa mipela i mas lukim kain pasin olsem?" Philemon i askim.

Se Puka i tok dispela tok orait bilong lon o dinau i no stap insait long 2011 mani plen o long Midium Tem Developmen Strateji bilong gavman.

"Sapos kain olsem gavman bai putim presa long enuel mani plen na bai lukim gavman i sot long mani long karim aut wok long ol arapela hap we em i long em.

"Mipela i bin gat win mani long las tripela yia i kam inap long nau we mipela i lukim K10 billion mani plen nau.

"Bilong wanem bai yu mas go na kisim K7 bilion dinau mani gen (K4 bilion long ausait na K3 bilion insait long kantri).

"Long dispela ol dinau mani, husat tru bai kisim gutpela taim, olgeta manmeri long PNG o liklik lain tasol?"

"Dispela i no gutpela mak bilong mekim wok," Se Puka i tok.

## Senis kamap long Buka Bris

BUKA Bris i go aninit long wanpela bikpela senis wantaim helpim i kam long Trensport Sekta Sapot Progem (TSSP) na Gavman bilong Australia long K3.6 milien.

Long givim tok orait long givim dispela mani mak PNG-Australia TSSP menesa Pam Griffiths i tok ol bai givim mak bilong mani bihainim kain wok i kamap na long hamas taim em i kisim long kamapim wok.

Na wok i kamap i mas bihainim mak bilong mani i go na long ripot bilong wok i kamap na mani i go i mas stap.

Aninit long TSSP PNG Port Ko-

poresen Limited (PNGPCL) i mekim ol senis long kostal bris, ovasis bris na ples bilong putim ol kago na ples we ol masin bai ron i go kam.

Ol wok we bai i kamap long ol kostal bris em strongim ap bilong putim ol kago.

PNGPCL sif eksekutiv opisa Brian Riches i tok fanding i kamap long rait taim na i tok amamas long helpim em PNG-Australia TSSP i givim.

Em i tok long taim wok i kamap wok bisnis bai go het yet bikos ol i gat plen pinis long wanem samting bai kamap.

Ripot long Enjiniaring Dipatmen bilong PNGPCL i tok strong bilong Buka Bris long stap na mekim wok i pinis na olsem ol opisa i mas senisim na putim ol nupela samting.

Namba tu projek long kamap long Buka Bris em long stretim hap we MV Gazelle Coast i bin bagarapim.

Ol hap we wok bai kamap em long rausim ol semen we i bruk, sel fenda, bolad, pri-kas simen dek penel na stoa na rausim olgeta hetdok we i bagarap, putim ol nupela simen.

Ripot bilon disain bai go long PNG Pot long rivyu na bilong givim tok

orait na kontrakta bai mekim wok bihainim long atoriti i makim wanpela.

Mobolaisesen na kamap bilong estblisemen, plen, ikwipmen na sait fesiliti bai kamap namel long tupela mun taim.

Namba projek we bai kamap long Buka Bris em long stretim hap ples we ol masin i wok long go kam na long ples we ol wokman i save putim ol kago.

Long taim dispela ol wok i wok long kamap Riches i tok olgeta lain husat i stap na mekim wok long dispela hap i mas gut long wokabaut na stap bilong ol.

## Wok maining senisim sindaun bilong Gende pipel

Paul Zuvani i raitim

WANPELA bikpela savemeri long wok bilong save long kastom na tredisen bilong ol manmeri na long wei ol manmeri i stap long en i tok wok maining long Yandera na Ramu bai mekim bikpela senis long laipstail bilong ol Gende pipel.

Na planti i no redi long bungim dispela senis, Dokta Lauren Zimmer-Tamakoshi husat i bilong Amerika na marit long Saipan (Japan) man i mekim dispela tok

long Nesenel Risests Institut (NRI) long Mosbi long wok em i mekim namel long dispela lain pipel.

Gende pipel em ol pipel husat i kam long ol tripela bikpela traib olsem Yandera, Karizokera na Gegru we wok maining bilong Ramu Nikel na Yandera Kopa bai kamap long em

Dokta Lauren i tok em i bin wok 26 krismas olgeta wantaim dispela lain pipel.

"Ol manmeri i nogat planti mani bipo, tasol nau ol i gat. Ol i no

save long yusim dispela mani na wanpela rot bilong ol i yusim dispela mani em long pilai kas.

Em i tok sampela long ol dispela ples em kampani bai surukim i go long narapela hap graun bikos long wok maining we bai kamap.

Em i tok planti ol yangpela manmeri i no bel sut o wari long kain senis we bai kamap.

"Ol i amamas tasol. Ol manmeri husat i wari em ol lapun manmeri tasol."

Em i tok planti ol senis na gut-

pela sindaun olsem haus sik, skul na wok bisnis bai kamap na olsem ol pipel i mas redi long kisim dispela senis.

Sampela kastom bilong ol Gende tu i wok long senis.

"Ol yangpela bikos ol i gat mani i stat long maritim moa long wanpela meri. Na ol meri i sensim lukluk bilong ol na i stat long maritim ol man husat i gat mani na i no bihainim kastom bilong marit we ol i bihainim laik na tingting bilong papamama long husat ol i mas maritim."

"Big man sistem i dai pinis. Nau em man o meri husat i gat mani."

Em i painim aut tu olsem dispela em i namba wan taim long histori bilong kantri long nogat wanpela man o meri i kros long kamap bilong main.

"Ol pipel i amamas long kamap bilong main."

Em i tok bipo Saina Ramu Nikel i no save givim kain sevis we ol manmeri i laikim long em tasol liklik Australia Marengo kampani i kamap na nau ol i lukim gutpela na bikpela senis."

# BSP bosman kisim skul

“LIDASIP i samting we wanpela i askim long go pas long ol arapela na i laik bihainim tingting bilong ol arapela tu.”

Tupela tim bilong ol menesa bilong BSP i no long dispela wik i bin kisim tripela de Lidasip “Effectiveness and Advancement Program (L.E.A.P)” long helpim ol long painim nupela rot bilong kisim tingting na mekim samting.

Taim wanpela i save moa, dispela bai helpim ol long ronim gut wok bilong ol.

Tupela bikpela toktok long woksop em “Bosim yu yet olsem yu ken save long bosim ol arapela” na “Long go pas gut long ol arapela-yu mas mekim we ol i ken luksave long strong na save ol i gat long em.”

Ol bosman bipo long ol i kisim skul i ting long kamap bosman dispela i min save bilong ronim wok tasol kain tingting i senis bihain long ol i kisim skul.

Ol i kam save olsem



LAINIM WOK: Ol bosman bilong BSP bihain long ol i kisim skul. Foto: BSPmedia

bosman i min:

- WANPELA i mas kam save gut long em yet;
- WANPELA i mas gat strong bilong mekim ol disisen na karimaut ol disisen;
- WANPELA i mas gat daunpasin na bihainim gutpela pasin;
- WANPELA i mas

helpim narapela man long kisim save; na

- WANPELA i mas larim ol arapela i soim strong na save ol i gat long en.

Deputi Jeneral Menesa na Hetman bilong Trening, Bob DeBrouwere, i amamas long givim dispela skul. Em i tok tingting

bilong BSP long trenim ol wok manmeri bilong en bai go moa long besik menesmen program we ol i save ronim long pastaim.

Ol program bilong dispela taim bai helpim ol wok manmeri, moa long ol bosman long ol i mas kisim kain skul we bai helpim ol gut na ol arapela we ol i wok wantaim.

## BSP opim wanpela moa ATM

BIHAIN tingting em gat long stap BSP wanpela moa taim gen i lonsim wanpela otometik teling masin (ATM) long wanpela bikpela stua kampani long wol, Courts long Gordons long aste.

BSP Sif Eksekutiv Opisa, Ian B Clyne, i opim bilong masin.

Wanpela dispela lonsing, BSP nau i gat 178 ATM long kantri.

Dispela namba bai go antap moa inap long taim em i kamapim 400 ATM long kantri, bihainim plen em i gat.

Long taim em i mekim olsem em i save kain sevis i helpim planti manmeri.

“Mipela bai go het yet long kamapim moa ATM network bikos long tingting na plen mipela i gat long kastoma bilong mipela.

“Dispela sevis bai helpim ol long rot ol i laikim long mekim wok benking bilong ol long wanem taim, ples na hap ol i pilim gut long em,” Mista Clyne i tok.

long bekim Courts jeneral menesa, Mark Curtis, i tok tenk yu na i go pas long opim bilong dispela masin.

“Dispela bung wantaim BSP i soim mipela i tok promis long wok bung wantaim long givim sevis long kastoma bilong mipela,” Curtis i tok.

Long ATM ol BSP kastoma i ken sekim balens, rausim mani, kisim telepon kredit, kisim toksave long wok i kamap long akaun, salim mani long wanpela akaun na go long narapela akaun, na senisim pin namba.

Ol manmeri i kam



GIVIM SEVIS: BSP CEO, Clyne i presim namba na kisim mani long BSP ATM long Courts, Gordons. Foto: BSP

long narapela kantri long wok bisnis o laik kisim amamas i ken yusim MastaKad long BSP ATM.

Wantaim kamap bilong MastaKad long BSP ATM dispela bai strongim tingting bilong ol kastoma long mekim gut wok.

Na taim dispela ol gutpela sevis i wok long kamap, Benk i no long taim i bung wantaim Westpac long lukim kastoma bilong tupela i yusim ATM

bilong wanpela na arapela long mekim wok benking.

Dispela ol sevis i helpim ol kastoma long mekim hariap na gutpela wok we bipo ol i save mekim isi isi.

“BSP i askim ol ritel kastoma long yusim SMS benking, ATMs na Eftpos long mekim wok benking bilong ol.

“Taim ol i mekim olsem ol i no wet longpela taim tasol i kisim isi sevis ol i laikim long em,” Clyne i tok.

**THE NEXT BIG THING TO HIT THE AIRWAVES IN PNG..**

**“Nau Em Taim”**

An exiting new radio drama series in Tok Pisin

Commencing 22nd February 2011  
9:30 on FM 100

**Live, Love, Laugh Family Show**

BROUGHT TO YOU BY:  UNITED NATIONS

PRODUCED BY:  POPULATION MEDIA CENTER

PROUDLY SUPPORTED BY:   

# Agrimen bai sapatim ol helt na jenda progrem

Veronica Hatutasi i raitim

HELT, jenda na humen rait em tripela bikpela samting we Nu Silan na Yunaitet Nesens (UN) long PNG i kamapim nupela wok patna namel long ol long wok bung na etresim long PNG.

Aninit long dispela nupela wok patna, Nu Silan i putim NZ\$2.5 milion long helpim PNG i kamapim gutpela helt system na moa yet, long ol rurel eria bai helpim ol mama i gat helti na seif laip taim ol i daunim mak bilong ol mama i save dai taim ol i karim pikinini. Na sevim bikpela mak bilong ol pikinini we krismas bilong ol i stap aninit long 5-pela krismas i go daun long wanpela de i save dai.

“Long olgeta 100,000 ol mama long PNG i karim pikinini insait long wanpela yia, 733 i save bungim hevi na sampela i dai. Dispela i bikpela mak tumas na yumi mas givim moa sapatim long ol “mid wive” o ol nes i save helpim ol mama i karim bebi na ol rurel etpos i mas gat ol marasin na ples we ol mama i ken go long em long karim bebi.

“UN i bilip olsem i moabeta long gavman bilong PNG i apim man-



SAINIM LONG WOK PATNA: Bos bilong UN long PNG, David McLachlan-Karr, na Hai Komisina bilong Nu Silan, Marion Crawshaw i sainim patnasip agrimen long putim mani long wanpela akaun bilong UN bilong sapatim ol helt, jenda na humen rait progrem long PNG. *Poto: Nicky Bernard*

imak long helt na long PNG inapim ol Milenium Developmen Gols (MDG),” David McLachlan-Karr, em bosman bilong UN sistem long PNG i tok.

Bilong strongim na kamapim gut ol wok long meri, mama na pikinini helt, daunim pasin bilong paitim na bagarapim meri na kamapim gut rait bilong ol meri, Nu Silan na UN i bin sainim wanpela agrimen we i lukim Nu Silan i putim NZ\$2.5 milion aninit long UN Kantri Fan, long kari-

antap long tupela yia.

Putim mani aninit long wanpela UN Kantri Fan bai helpim daunim kos long ol patna na UN na bai gat moa mani long karimaut ol UN progrem long helt, jenda na humen rait.

“Mipela i amamas long go insait long dispela agrimen long wanem, Nu Silan i sapatim strong UN na ol helt na jenda progrem. Dispela tupela progrem eria em Nu Silan i sapatim strong long PNG. Em i bikpela samting long apim stetus o stap bilong ol meri na Nu

Silan bai skruim wok long PNG i kamap helti kantri,” Hai Komisina bilong Nu Silan long PNG, Marion Crawshaw i tok.

“Patnasip i bikpela samting i go wantaim rifom wok we UN i wok long kamapim long en. Dispela i min olsem bai dispela i sapitikm strong na kamapim gut ol progrem bilong UN we i sapos long kamapim gutpela senis long kantri level n a long wankain taim tu, daunim ol kos long karimaut ol progrem, Mista McLachlan-Karr i tok.

## Olgeta mas wok long rausim kolera

Veronica Hatutasi i raitim

EM i WOK bilong wan manmeri, komyuniti na olgeta pipel long kantri i mekim samting long daunim sik kolera long PNG, Siaman bilong Nesenel Kapitel Distrik Kolera Task Fos, Dokta Timothy Pyakalya i tok.

Em i tok “bacteria” o binatang bilong sik kolera i stap yet na em i ken paia sapos pipel i no mekim samting stret

Dokta Pyakalya i wokim dispela toktok taim Wantok i askim em level bilong sik kolera i stap olsem wanem insait long Nesenel Kapitel Distrik long dispela taim.

“Sik i go daun nau tasol insait long wanpela de nau, wanpela o tupela pipel i gat sik kolera i save go long haus sik. Sampela de, i nogat sik kolera lain i go long haus sik. Mun Janueri i bin lukim bikpela mak bilong pipel wantaim sik kolera long haus sik, tasol planti i bilong Sentrel provins,” Dokta

Pyakalya i tok.

Em i tok sapos wara na sanitesen i no gutpela, kolera bai kamap. Olsem na man i mas bihainim gutpela haijin long wasim gut han wantaim sop taim yu redim kaikai, bipo yu kaikai na bihain long yusim toilet, dringim klinpela na seif wara. Na karamapim gut kaikai long stopim ol lang na pipia i go long en.

Dokta Pyakalya i tok kolera em i sik i save kisim pipel long olgeta hap bilong wol taim i gat hevi long wara na sanitesen na yumi long PNG i mas wok bung wantaim long daunim olgeta dispela sik.

“Ol komyuniti na olgeta pipel i mas mekim samting long stopim kolera long PNG,” Dokta Pyakalya i tok.

Stat long taim sik kolera i bin kamap long NCD long las yia Epril, 3-pela pipel i bin dai, samting olsem 3,000 pipel i bin kisim dispela sik na 1,600 pipel i bin kisim bagarap tru na ol i bin slip long haus sik.

## Senisim pasin na pas wantaim wanpela patna

OL SENIS long “sexual behavior” o pasin long manmeri i poroman na slip wantaim na pas wantaim wanpela patna tasol i wok long daunim mak bilong sik AIDS long Afrika. Na i no modol bilong ol westen kantri o ol waitman, wanpela nupela buk i kamaut nau tasol i tok.

“Affirming Love, Avoiding AIDS: What Africa can Teach the West” em Matthew Hanley na Dokta Jokin Irala i raitim i toktok long saiens o rot long stopim AIDS na wanem i wok tru we dispela buk i tokaut long em. Na i wok long daunim mak bilong sik AIDS i go daun long sampela hap bilong Afrika, moa yet, long kantri Uganda.

Insait long wanpela intevyu wantaim Zenit, raita Hanley i tok “Afrika i lukim mak long sik AIDS i wok long go daun bikos long senis long “sexual behavior” na moa yet, “Fidelity” o samting we publik helt komyuniti i kolim long “partner reduction” o pas wantaim wanpela patna.

“Long narapela sait, dispela em i no samting bilong kirap nogut long en bikos rot we AIDS i go antap em long man o meri gat planti patna o poroman em i slip wantaim long ol. Long wankain taim, ol rot we ol AIDS ogenaisesen i bihainim abrus long daunim dispela sik nogut. Yusim kondom o karamap em dispela rot we yumi olgeta i save long en, tasol em i bikpela samting long save olsem ol ogenaisesen i wok hat long daunim AIDS.

- I kam long Zenit Nius Ejensi bilong Vatiken

## Ol Rait bilong Yumi.

YUMI na HIV WANTAIM Fr Jude Ronayne Forde OFM



ATING yumi olgeta i lukim planti manmeri nabaut long graun i wok long protes o autim tok agensim nau. Graun nau i pulap tru long ol yangpela lain. Bikpela namba i stap long graun nau i aninit long 30 krismas. I gat planti yangpela i stap long PNG tu. Hap stret (50%) bilong ol lain i stap laip long PNG tude i no bin stap taim mi kam long kantri bilong mekim wok misinari.

Ol yangpela i gat tingting, ol i gat laik, na ol i smat tru long kisim na salim tok. Komyunikesan – ol i nap salim tok i go i kam long olgeta hap bilong graun; ol inap toktok namel long ol yet na gavman o bikman i no inap pasim tingting na maus bilong ol yangpela!

Tu, ol yangpela i gat rait na dispela em long rait long laip! Rait long sindaun gut na kisim gutpela laip. Rait long tokaut na makim wanem kain laip ol i laik bihainim. Lukim laik long senis i kamap nau long planti hap bilong Arab-wol olsem Tunisia, Saudia Arabia, Isip (Egypt), Jordan, Algeria na Siria. Dispela kain tok revolution o senis i stat long kam insait long PNG tu. Dispela kain tingting na toktok i stap insait long sampela pas ol i raitim long niuspela long dispela wik tasol!

Planti ol bikman na maniman bilong graun nau i wok long guria. Ol yangpela i wok long komplek nau long kontrol na we ol bikman (MAN i no meri) i save bosim ol pipel. Ol gridi-man i save tingim ol yet na lukautim sindaun bilong ol yet na i save lusim ting long ol yut, tarangu, na ol pipel.

Ol yangpela bilong graun i kraik long kamap fri na i laik.

- Bai gavman na ol lida i harim singaut bilong ol.
- Bai ol i gat rait long senisim gavman na lida.
- Bai ol i gat sans long kisim gutpela edukesen.
- Bai ol i gat ol kain kain sevis bilong lukautim ol.
- Bai ol i gat sans long wok mani na kirapim famili laip bilong ol.

Ol yangpela i gat bikpela laik na tingting long gat gutpela tumora na gutpela sindaun bilong ol yet na pikinini bilong ol. As bilong wari em, laip bilong tude i no gutpela tumas. ol i lusim bilip long ol Lida na gavman. Ol i pilim gavman na Lida i no laikim ol tru na i save yusim ol! Wankain tok na laik i wok long kamap long planti hap bilong graun, na i stap long PNG tu.

Ol dispela kain komplek i stap na i tru long PNG tu. Yumi olgeta, i no yangpela tasol, i pilim gavman na ol bikman i no harim tok bilong yumi na ol i givim baksait long singaut na wari bilong ol pipel. i luk olsem, ol i yaupas. Ol sevis i no stap - edukesen em i no kamapim gutpela samting, yangpela i nogat tumora, ko-

rapsen i stap insait long gavman na olgeta dipatmen na opis bilong gavman. Komplek bilong ol yangpela bilong Isip i wankain komplek i stap long PNG tude! Gavman i mas kirap nau na harim singaut bilong ol pipel na wokim senis, bipo em leit tumas!

Tasol, mi yet, taim mi tingim ol rait bilong ol man, meri na pikinini, pastaim mi save tingim “rait long laip”. Olgeta i gat rait long stap laip na long kisim olgeta samting bilong strongim na lukautim laip. Katolik Sios i save karamapim ol dispela tingting long “rait bilong man” long loa bilong laik pasin em loa bilong Jisas yet. Sapos yu soim laik pasin, yu rispektim laip bilong narapela na yu givim em olgeta “human rights”. Mi laik tok strong long tripela ol rait i bagarap long PNG tude.

- Dispela pasin i stap long kilim man o pikinini indai, ol vailens em i nogut olgeta;
- Dispela pasin bilong korapsen, stil na giaman pasin i nogut olgeta;
- Dispela pasin bilong holimpas long pawa na i no givim spes long toktok o laik bilong narapela i nogut. Gavman mas i kam i go na lida i senis – yangpela tu i gat save!

Wok bilong papamama na ol lida em bilong lukautim gut kantri na ples bai pikinini i gat gutpela ples bilong sindaun. Tasol, mi pilim ol tumbuna (Bubu) na papamama i feil o pundaun na pikinini i kisim hevi long ol samting nogut ol i mekim. Mi tok long HIV/AIDS.

Taim mi stap yangpela, dispela sik nogut i no stap. Ol bubu i no wari long dispela sik na i wankain long ol papamama. Tasol ol yangpela na ol pikinini i gat bikpela wari tru long dispela sik. Sapos yangpela meri i bungim yangpela man, namba wan tok namel long tupela em long HIV.

Bikpela pret i stap bikos ol i save dispela virus o binatang bai bagarapim ol na pikinini bilong ol. Ol yangpela i no fri! “Rait long laip” bilong ol i go pinis! Tingim pikinini em mama i karim em na em i HIV pinis. Laip bilong em i bagarap pinis. Tingim yangpela i laik go marit na i kisim sik HIV long boi o gelpren. Hamas yangpela, meri i virgo i go marit na i kisim sik HIV insait long marit bilong em? HIV i save stilim ol “human right” bilong man na meri. Yu kisim dispela sik na yu rabis long ai bilong komyuniti.

Yes! Planti tok nau long graun em long “ol rait” bilong man. Rait bilong laip i bikpela tru, tasol sapos yu sik na indai, ol rait bilong yu i go pinis nau. Givim sik HIV long narapela i nogut tu! Sapos Kristen komyuniti i stap tru long nem Kristen, bai komyuniti i rispektim na lukautim “rait” bilong olgeta. Na wan wan bai rispektim na lukautim “ol rait” bilong narapela. Dispela pasin bilong vailens, korapsen na kontrolim man, na givim sik nogut long narapela i no Kristen pasin. I gutpela yumi tingim “ol rait” bilong ol man nau!

Krais i blesim yupela!

# Tupela meri i wokim gut long Bogenvil polis trening

TUPELA meri i bin wokim gut stret long winim ol wanskul polis opisa husat i bin greduet long Tunuru Katolik Misin klostu long Arawa long Sentrel Bogenvil.

Teti tri (33) yangpela manmeri i bin pinisim trening na kisim setifiket bilong besik komyuniti oksileri polising (CAP) insait long wanpela seremoni long Tunuru Katolik Misin we bosman bilong ol polis long Bogenvil, Thomas Eluh, Ekting Nu Silan polis komanda long Bogenvil em Claire Starr, Kieta Distrik Etrministreta, Lucy Travertz, man i makim Me'ekamui em William Mungta, ol polis long Buka, Arawa, Buin na Bana stesen i bin stap long witnesim dispela selebren.

CAP Anastasia Tologina bilong Buka Koman em dispela meri husat i bin mekim gut stret long akademik sait na winim olgeta ol wanskul bilong em long kisim daks awot.

CAP Belinda Eric bilong

Wakunai, Sentrel Bogenvil, i bin mekim gut stret na kisim awot long top sumatin long dril trening.

Mista Eluh i bin toktok strong long ol opisa long mekim gut wok bilong ol olsem ol wokman bilong lo. Em bin tokim ol tu olsem ol i pinisim tasol namba wan hap long trening bikos moa trening bai kamap long ol taim i kam.

Long wankain taim, Komanda Starr em hetmeri bilong Nu Silan Polis program long Bogenvil taim em i tok amamas long ol opisa bilong pinisim gut kos bilong ol, i tok skul trening bai go het yet long ol taim i kam.

Sinia provinsel kot mejistret, Peter Toliken, i bin go pas long hap insait long seremoni we ol opisa i mekim ol tok promis bilong ol. Em bin tokim ol nupela greduet olsem "self discipline" o bihainim gutpela pasin na karimaut gut ol wok bilong ol i bikpela samting long ol oksileri na regula polis opisa.

**M**eri Wantok i amamas long toksave olsem stat long dispela wik, Lorraine Siraba, em Projek Kodineta long Yut Riprodaktiv na Seksuel Helt Projek wantaim Yang Wimens Kristen Asosiesen (YWCA) bai save kamap olgeta wik na toktok long ol samting i karamapim ol yut na famili long kain stap yumi gat long em tude. Lorraine i bin wanpela redio niusmeri wantaim Nesenel Brotkasting Koporesen (NBC) tasol em i lusim na go wok wantaim YWCA long 2004. Em i go pas long YWCA Tok Stret program we i save kamap long NBC Karai na Kundu 2 TV na holim ol pablik toktok long riprodaktiv helt isus. Lorraine i bin kisim Mastas Digri long Pablik Etvokesei na Eksen long Victoria Yunivesiti, Melbon, Australia bihain long em i wokim tupela yia kos long hap. Em i save karimaut trening long ol yut i skul na ol dispela i no skul long etresim ol jenda, famili plening, prenpasin, ol yangpela meri i bel na ol narapela wari na hevi olsem ol yut bilong tude i bungim long en.

**B**IPO long skul i stat, ol beng na stoia i bin pulap tru wantaim ol papamama na ol pikinini i baim ol skul fi na ol yunifom wantaim ol narapela samting bilong redi long nupela skul yia. Sampela sumatin i amamas long go long skul na bungim ol poroman na lainim ol nupela samting.

Tasol long sampela, nupela yia i no bringim gutpela samting. Planti pikinini i gat namel long 14 na 20 krismas i no painim spes long hai, sekonderi na teseri skul long kantri. Na sampela moa tu i no inap skruim skul bilong ol bikos ol i sot long skul fi mani. Ol dispela yangpela bai joinim ol narapela tausent yut husat i stap nating wantaim nogat sans long skruim skul o wok.

Ripot bilong Nesenel Kapitel Distrik (NCD) Edukesen Divisen, las yia long NCD tasol, 5,166 sumaitin namel long 14 na 17 krismas i bin sindaun long Gret 8 na resis long 2,322 spes long skruim skul i go long Gret 9. Tasol nau, 2,800 i nogat spes na bihain taim bilong ol i stap long hevi. Mak i go antap taim yumi putim ol wantaim ol Gret 8, 10 na 12 long olgeta hap bilong kantri. Long ol pikinini meri, em i ki o bikpela samting we inap givim ol gutpela bihain taim, tasol taim ol i no kisim gutpela skul, ol bai no inap stap amamas o gat gutpela luksave o sanap long wankain level



**Yut, Meri na Famili wantaim Lorraine Siraba**

wantaim ol man.

Ol dispela lain i lusim skul hariap, sem, ol i feil na nogat gutpela lukluk long ol i bagarapim ol na ol i no save nau wanem samting ol bai mekim na bihain taim bilong ol i no gutpela. Sori tru, long Mosbi siti na long planti ol taun long kantri, bai yu lukim olsem dispela kain samting i kamap bikpela. Na taim ol dispela yangpela i nogat samting bilong wokim, ol i go insait long ol samting i agensim lo olsem mekim na salim hombru, spakbrus (mariwana) o wokim pamuk pasin long lukautim ol yet. Gen, ol pikinini meri i stap long mak long wokim ol samting i no stret bilong painim mani long lukautim ol yet.

Tasol bipo yumi komplek long ol pikinini "beggar" o askim long mani samting long strit, salim hombru o wokim pamuk pasin, i gutpela yumi askim yumi yet sapos yumi givim sans long sampela samting we ol yut i ken mekim bai ol i lusim ol bikhet pasin.

Olsem planti ol narapela kantri i wok long develop nau, PNG i gat bikpela populesen long ol yangpela pipel na em i bikpela long ol provins i kamapim ol sans we ol dispela yangpela i ken yusim ol save bilong ol na long helpim sosaiti kisim ol gutpela samting. Risets i soim olsem planti siti i no inap givim wok long bikpela mak bilong ol yangpela pipel i stap nating na olsem, planti i stap nating i nogat wok na i nogat gutpela skul.

Long 192 milion pipel long wol i nogat wok, 32 pesen o klostu haf em ol yangpela pipel. Nogat wok em man bai stap turanguna dispela em i wanpela bikpela wari na hevi we bikpela lukluk i mas go long en.

Ol lain i wokim disisen i mas kamapim ol program na wok long promotim wok long ol pikinini i lusim skul long Gret 8, 10 na 12. Ol bisnis haus i mas opim dua bilong ol long ol yangpela pipel i mekim pat taim wok.

Ol atoriti i lukautim i mas glasim rot we edukesen system i ken helpim ol yangpela pipel long lainim ol samting we bai helpim ol long kisim wok.

Olsem pipel bilong dispela kantri, yumi mas kamapim wanpela modul we bai redim ol yangpela bilong yumi long gat save long ol wok we bai developim kantri i go het gut.

# have you tried Corned Tuna?

**NEW**

# DIANA

## Corned Tuna

*Kids will surely love it.*



Serving Suggestion

*The taste  
of Corned Beef  
and Tinned Tuna  
in one!*



PROUDLY  
PNG  
MADE



RD Tuna Cannery Ltd.  
PO Box 2113, Madang,  
Papua New Guinea



# Serim lidasip i kamapim gutpela samting long olgeta sios

**NAMBawan** meri bisop bilong Lutheran Sios long wol, **Bisop Maria Jepsen**, i tok ol man na meri i serim lidasip posisen long sios i kamapim gutpela samting, i no long Lutheran Sios, tasol long olgeta sios.

Maria Jepsen i bin holim wok olsem bisop bilong Hamburg, Jemeni, long Not Elbian Evangelikel Lutheran Sios long yia 1992 inap long Julai las yia, 2010.

Tasol taim em bin kamap namba wan meri bisop bilong Lutheran Sios long wol, planti toktok kros i bin kamap namel long ol Kristen Sios husat i lukim olsem wok pater na bisop em i bilong ol man tasol.

"Long 1992 taim ol i makim mi olsem nambawan meri bisop bilong Gemeni na Lutheran Sios long wol, Vatiken i bin tok dispela bai kamapim wok bung namel long tupela sios. Tasol bihain mipela i harim olsem dispela toktok i no opisel toktok bilong Pop na sios, tasol em i tingting bilong mausman.

"Otodoks Sios long Gemeni i bin klostu wankain: Bai yumi wok wantaim meri olsem sios



**SERIM WOK:** Namba wan meri Lutheran Sios bisop, Bisop Maria Jepsen i tok tok wantaim Maronait Patriak bilong Antiok na olgeta Is, Holines Mar Nasrallah Boutros Sfeir, long wanpela wokabaut i go long Lebanon long 2007. *Poto: Not Elbian Evangelikel Lutheran Sios Midia*

lida?" "Wok bilong ol meri olsem spiritual lida i bin kamapim bikpela wanbel toktok long Katolik na Otodoks Sios. Tasol ekspiens i soim olsem long sait bilong wok tru tru, gutpela wok sering we i gat bilip namel long tupela i kamap," Bisop Jepsen i tok.

"Luksave-long olgeta sait

wantaim i mass tap long sait bilong ekumenisim o wokbung na intafeit o ol lotu i bung wantaim na wokim felosip.

"Olsem ol lida, yumi gat wok bilong Imakim na ukautim ol bikpela bilip na skul bilong sios. Mipela i luksave olsem long autim ol wok bilip, i nogat tambu long husat i mekim dispela wok,

maski em i man o meri. Long odain ministri o givim luksave na blesing long man o meri long lidasip level olsem bisop, dispela awenes i bin kamap leit, maski sampela sios i bin tok orait long dispela long 1960 samting," Bisop Jepsen i tok.

"Olsem ol man i wok long spiritual sait, mipela i kisim singaut long witnessim ol samting i no stret i wok long kamap long wol tude olsem ol risman i wok long go ris taim ol turangu i wok long go turangu moa, blek na wait man, man na meri na bildim bris long kamapim sosel straksa bai givim witness i go long Kongdom bilong God.

Dispela i askim mipela long gat daunpasi na long wankain taim tu, i mas gat strong long mekim ol wok na sosaiti i luksave olsem olgeta pipel i gat wankain rait, na man na meri i sanap long wankain level," Bisop Jepsen i tok.

## Moa stori long top sekyuriti gad bilong nau i dai Pop John Paul 2 i tingim wok bilong em...

### I kam long stori bilong las wik...

Swis Gad kepten, Roman Fringelli, i skruim stori long wokabaut wantaim Pop John Paul 2 long wol na wok lukaut em i givim taim birua i kamap.

WOKABAUT bilong Pop John Paul 2 i go long Gemeni long yia 1996 em wanpela we Kepten Fringelli i tingim olsem i bin kamapim bikpela wari. Long dispela taim, ol "anarchist" o lain i wokim protes i bin tromoim ol samting olsem ol ston na ol narapela moa i go long "Popemobile" o kar we i karim Pop long en taim ol narapela i wokabaut as nating taim Popmobile i ron klostu long ol.

"Hariap ol dispela longlong lain i stat tromoim ol repela balun ol i pulapim long peini i go long windua bilong Popmobile", Fringeli husat i sanap long baksait bilong Popmobile na rausim ol lain i protes nabaut.

"Mi bin sem long Gemeni long kain samting olsem i kamap na ol polis i larim ol dispela lain i kam klostu long Popmobile. Na mi tokim ol long noken kam klostu," Fringeli i tok.

Pop Benedict 16 i bai mekim wokabaut i go long Berlin long mun Septemba long dispela yia na i gat wari i stap olsem



*Vatican Swiss Guard*

wankain samitng inap kamap gen.

"Yu no save wanem samting i ken kamap long Berlin," Fringeli i tok. "Ol longlong lain tasol Pop Benedict 16 i bilong Gemeni na dispela i ken helpim tasol yumi no save. Ating ol polis bai mekim gutpela wok long kontrolim ol pipel." Fringeli i tok em i kirap nogut olsem ol polis long Gemeni i pret long stopim pipel long mekim trabel na moa yet long Paderborn we Pop i bin stop bipo em i go long Berlin. Long Afrika, Fringeli i tok ol i yusim ol stik long rausim ol.

Tasol long Afrika, Fringeli i painimaut olsem ol lokol sekyuriti i ken strik tru tu ya.

Taim Pop John Paul 2 i bin mekim wokabaut i go long Yaounde long Cameroon, em i tingim wanpela mental man

husat i bin wokabaut long fran bilong Popemobile. Ol polis i bin holim em long lek, pundaunim em i go long graun olsem wanpela bek potato na sut i go long em i

go long pipel. Nau yet, Fringeli i wari long dispela na em i tok em i "nogut tru" na em i samting bilong sem long en.

*Moa long neks wik...*

## Musik i ken pulim man long Krai na sios

MUSIK i ken mekim pipel i luksave long man husat i statim Kristeniti, em Jisas yet, wanpela bikman bilong Rasian Otodoks Sios em Metropolitan Hilarion Alfeyev, i tok.

Metropolitan Hilarion Alfeyev em i siaman long Dipatmen bilong Ekstenel Sios Rilesens bilong Mosko (Moscow) Patriakeid i bin wokim dispela toktok las wik long Katolik Yunivesit long Amerika i stap long Washington D.C.

Metropolitan Alfeyev em i wanpela "composer" o man i save raitim ol singsing na em i toktok long musik na bilip long laip na visen o driman.

Bikman ya i toke m i save olsem i nogat planti yangpela pipel i save harim "Classic Music" tasol olgeta lain i save harim "Popular Music".

"Mi ting olsem dispela em i no gutpela tru," Metropolitan Alfeyev i tok.

Tasol em i tok olsem em i orait long gat "secular music" o musik nating insait long eria bilong Kritianiti na dispela i karamapim klasikel musik we bikman i save laikim tumas.

Bikman ya i bin tok Kristianiti i no save putim ol strongpela banis long loa i karamapim ol ats. Em i tok Kristianiti i ken kirapim tingting bilong ol i no Kristen atis long autim sampela ol mesej long toktok bilong musik kalsa bilong tude. Na em i givim piksa long Jisas Krai Supasta" olsem wanpela musikel muvi we man i kamapim o komposim dispela musikel stori bilong Jisas i karim Kruse, pen na dai bin yusim kain toktok bilong ol yangpela long dispela taim.

"Piksa bilong Jisas i ken pulim tingting bilong ol sios lain tasol ol dispela tu i stap longwe long en.

Em i tok yumi noken tambuim ol long tingting, toktok na rait long Krai, tasol stori bai narakain sapos ol i laik bagarapim kristianiti, sios na

ol bilip manmeri.

"Sapos komposa o man i raitim kamap musik em i gutpela tru long wok bilong em na em i pulim ol

lisina o lain i harim musik, em i mekim ol kisim gut mining bilong ol samting i kamap long Gospel na ol inap krai, amamas na dispela i gutpela," Metropolitan Alfeyev i tok.

Em i luksave olsem rot long Kristianiti i save stat taim ol i painim Krai i stap laip na i no long skul bilong ol sios.

"Kristianiti em i sios we i fokus long wanpela man i stap laip na i wokim histri. Dispela man i pulim tingting bilong planti. Na em i ken kamap olsem man i kamapim o komposim ol musik samting long Gospel subjek i no wanpela man bilong lotu, tasol em i givim bikpela luksave long Jisas. Planti i statim rot bilong ol long painim Jisas na sios taim ol i kamapim ol singsing, maski i no olgeta hap long musik i sut long sios musik.

**GLASIM TOK**  
WANTAIM  
Fr Lollington Wiam



### Pasin Resis i nogat gutpela kaikai

YUMI glasim buk bilong Revelesen insait long Nupela Testemen, yumi bai ritim sampela ol tok i stap em Bikpela i mekim long 7-pela sin i bin i stap long taim bilong ol.

Dispela ol tok i sut long ol sios i stap long PNG tude. Long wanem sios bilong PNG i gat bikpela hevi i stap na yumi i no mekim stretpela wok bilong God.

Kain kain paul pasin, tok giaman, pasin stil, paulim bilip manmeri bilong narapela sios na pasin bilong daunim na givim kain kain tok giaman long narapela sios we em i kamapim bikpela hevi long dispela kantri na pasin bilong laikim narapela i nogat.

Orait, yumi glasim (Rev 2:1-7). Dispela tok i sut i go stret long ol sios bilong Efesus. Sios bilong Efesus i strong long bihainim olgeta kain loa na pasin ol kristen bilip, tasol ol i lus tingting long pasin bilong laikim ol arapela em i nambawan pasin ol inap holim strong long wanem pasin bilong laikim na givim bel isi em i winim namel tru na i save bungim olgeta samting wantaim sapos i nogat gutpela na laikim pasin i stap long bel bilong pipel. Orait olgeta arapela pasin i kamap samting nating.

Sios bilong Efesus i no moa i stap. Tasol tude, yumi lukim planti ol kain kain sios long PNG tu i mekim wankain ol pasin olsem sios bilong Efesus i bin mekim bipo.

Yumi lukim pasin bilong daunim ol arapela sios, pasin bilong grisim na pulim ol memba bilong arapela sios na pasin bilong tok 'Sios bilong mipela i kamap nambawan na bikpela tru nau i stap.

Na ol sios i mekim ol pipel long siti, taun na ples i bruk nabaut. Sapos yumi gat dispela tingting bilong wok resis i kisim ol manmeri i kam insait long ol sios bilong yumi, dispela i soim tru olsem yumi nogat trupela laik pasin bilong Bikpela na long ol kristen brata na long arapela pipel.

Em olsem wanem, yumi fulfilm o inapim vokesen bilong yumi o yumi mekim ol i paul na brukim ol pipel bilong God.

Em i gutpela salens na wanwan sios i mas glasim na mekim wok stret olsem gutpela was man bilong sipsip olsem Jisas yet.

*...Plant  
yangpela  
no save  
long  
"Classical  
Music".*

# Pagelio i tok ol skul i mas helpim ol yet

Veronica Hatutasi i raitim

OL LIDA bilong ol skul long kantri i kisim tok long promotim "self reliance" o pasin bilong wokim samting long helpim ol yet na i wet long sindaun tasol na kisim samting taim ol i mekim ol wok bilong ol. Dispela em long lukim olsem ol risos na ol skul bilding i ken stap gut long ol sumatin i ken yusim.

Ekting Edukesen Sekreteri, Dokta Joseph Pagelio i tok olsem long dispela yia, 2011, ol bai karimaut ol bikipela projek we bai kamapim gut kwaliti bilong edukesen long kantri na olsem, em i askim olgeta stekholda o patna long edukesen sekta long redim ol yet na ol i ken helpim long kisim edukesen sevis i go long skul level.

Olsem na Dokta Pagelio i strongim ol nesenel na provinsel edukesen institusen long wok hat na ol i ken inapim ol bikipela samting ol i taget long em long dispela yia.

Long wankain taim, Dokta Pagelio i autim tok tenkyu i go long ol dispela Provinsel Divisen bilong Edukesen, ol woklain bilong Distrik Edukesen, ol leksera, ol tisa na ol oksileri woklain long stat wok long taim stret.

Em i tok amamas tu long ol skul Bot Menesmen na ol Gavana, ol Gavaning Kaunsel na ol papamama bilong mekim ol wok redi insait long klasrum eria na ausait na ol samting i bin redi gut bipo skul i bin stat long las wik, Mande Februari 7.

Em i tok bikipela tok tenkyu i mas go long ol dispela tisa husat i bin redim ol progrem bilong ol wanpela wik bipo skul i stat.

Em i strongim tu ol provinsel atoriti long tingim ol detlain bilong ol skul ektiviti o wok i stap long 2011 edukese kalender.

"Bihainim gut ol detlain na bai ol samting bilong salim i go long Provinsel hetkwata long taim stret, olsem i stap long Sekula o Pas Namba 42/2010 bilong sekreteri," Dokta Pagelio i tok.

# Givim trening bilong inapim Visen 2050

OL YUNIVESITI na ol haia edukesen institusen long kantri i mas skulim na trenim ol sumatin long ol kos we bai inapim ol taget bilong Nesenel Gavman long Visen 2050, Dairekta Jenerel bilong Opis bilong Haia Edukesen, Dokta William Tagis i tok.

Dokta Tagis i wokim dispela toktok long seremoni i bin kamap long Yunivesiti bilong PNG (UPNG) long dispela wik Mande bilong welkamim moa long 1,000 nupela sumatin i go insait long UPNG long dispela yia.

"Nau yumi toktok long kain wokfos mipela i laikim long yia 2050. Dispela wokfos bai kamapim mani bilong groim ikonomi o wok mani bilong kantri long ol lain i stap long "middle income economy" o namel mak level," Dokta Tagis i tokim ol sumatin.

Em i tok aninit long Visen 2050, nesenel gavman i lukluk moa long ol praoriti eria we bai kamapim ol bikipela wok go het long skruim gro bilong ikonomi na ol sumatin i mas kisim trening long ol dispela eria.

Long wankain taim, Dokta Tagis i singaut long UPNG na ol narapela 29 institusen i kam aninit long OHE bilong mekim ol senis long ol kos long inapim ol taget we gavman i laikim long en.

Em i tok nesenel gavman i laikim bai ol gavman dipatmen i bildim ol strettijik plen i lukluk i go long Visen 2050. Em i amamas olsem UPNG i wok long mekim ol wok bihainim dispela Visen plen long trenim ol yangpela pipel.

Dokta Tagis i tok kam yia 2030, bai i gat moa long 20,000 lain i greduet

husat i redi long go insait long wokfos na em i wokim strongpela askim long ol i mas inapim taget bilong gavman.

"Kam yia 2030, lukluk i stap olsem PNG bai go pas long ikonomi o wok mani insait long Esia na Pasifik rijen na yumi olgeta i mas wok hat long inapim dispela.

"Salens bilong mi i go long yupela ol sumatin em bai yupela i stap we bihain yupela i pinisim skul. Bai yupela i helpim long inapim taget bilong yumi long 2050?" Dokta Tagis i bin askim ol sumatin.

Dokta Tagis i go moa na tok skolasip sapot sistem bilong gavman i no inap stap longpela taim na moa yet, taim gavman i wok long glasim na tagetim ol spesel gavman praoriti eria na ol pipel husat i no kisim ol gutpela sevis.



**REDI LONG OL SALENS:** Dispela ol miks Gret 11 na 12 sumatin long Pot Mosbi Nesenel Hai skul long Nesenel Kapitel Distrik I soim olsem ol i redi long ol salens bilong ol skul wok long dispela yia. *Poto: Nicky Bernard*

# NRI bos kisim luksave

## ...Kamap Profesa long Deakin Yunivesiti

STAT OLSEM wanpela Praimeri skul tisa na i go antap long Polisi na Plening eria bilong Edukesen Dipatmen, Provinsel Etministreta long Westen Hailans i go kamap leksera long Yunivesiti bilong PNG na Dairekta long UPNG Open kempus inap nau i Dairekta bilong wanpela bikipela risets skul long PNG em Nesenel Risets Institut (NRI), Dokta Thomas Webster, nau i kisim bikipela luksave long Deakin Yunivesiti long Kenbera, Australia we i mekim em Profesa long Skul

bilong Intanesenel na Politkel Stadis long hap.

Deakin Yunivesiti i givim dispela honoreri taitel bilong luksave long gutpela wok tru we Dokta Webster i bin mekim long stiaim gut ol wok risets na givim ol polisi etvais i go long ol planti gavman ejensina ol narapela developmen patna.

Insait long wanpela liklik seremonin we ol woklain bilong NRI i bin holim long las wik Fraide bilong selebretim dispela bikipela luksave Dokta Webster i kisim, Deputi

Dairekta bilong risets em Dokta Musawe Sinabare i tok dispela taitel em i go antap long ol wok we Dokta i bin mekim olsem wanpela akademik na lida long edukesen klostu long 40 krismas.

Namel long yia 1997 inap long 2010, Dokta Webster i bin kamapim ol wok long risets ripot, ol raiting long jenel, kontribut long ol buk sapta, niuspapa atikel na ol konsaltensi ripot long ol wan wan oge naisen na gavman dipatmen.

Dokta Webster i holim ol wok

long siaman na lidasip level long ol narapela oge naisesen long Australia na Pasifik rijen olsem Siman bilong Australia PNG Insentiv FanMenesmen grup, memba bilong Pasifik Ikonmik Buletin Editoriel Bot na i memba bilong PNG Len Bot.

Dokta Webster i tok makim bilong em bai strongim wok patna namel long NRI na Deakin Yunivesiti we ol i bin sainim agrimen long en long pinis bilong las yia we i strongim tupela "think tank" in-

stitusen bilong ol savelain long en.

Stat long taim em bin kisim wok olsem Eksekutiv Dairekta bilong NRI long yia 2004, em i kamapim planti gutpela senis na ol wok kamap long plening na ripoting sait wantaim 5-pela yia Strettijik Plen, tripela yia Koporet Plen na gutpela fainensel menesmen sistem. Wok long appretim ol opis bilding long NRI i stat long yia 2007 inap long 2009, i narapela bikipela samting we Dokta Webster i bin go pas long en.



**TOK PISIN NEWS**  
from Radio Australia  
radioaustralia.net.au

Harim TOK PISIN long  
Radio Australia  
**101.9FM**  
Port Moresby

**Tok Pisin Service**  
6am - 7am 6080; 7240(KHZ)  
7pm - 9pm 5995; 6020; 9710; 1280(KHZ)

## Singapore bai nupela gambling capital

I BIN wanpela yia tasol bihain long em i opim namba wan kasino bilong em, Singapore i kamap olsem nupela pilai laki ples long Esia, lukim planti bilian dola i go insait long ekonomi bilong kantri.

Wanpela fainens konsalten grup, Pricewater House Coopers, i bin tok em i bin makim olsem long las yia tasol, kasino bilong Singapore i bin kamapim samting olsem 2.8 bilian Amerika dola.

Na Pricewaterhouse Coopers i bin ting olsem Singapore bai inap winim Saut Korea na Australia dispela yia na kamap olsem namba tu bikpela Esia na Pasifik kasino maket bihain long olpela lida bilong kasino maket, em long Macau.

## Militari bilong Egypt bai lukautim pastaim gavman

MILITARI bilong Egypt i bin tok em bai lukautim ol wok bilong mekim ami i lukautim gavman pastaim, bihain long olpela Presiden Hosni Mubarak i bin pinis long wok bilong em.

Niusman Mrak Wilacy i ripot i kam long Cairo olsem nupela ol lida bai holim namba wan miting bilong ol sampela taim dispela wik.

Nupela hetman bilong Egypt Militari, Field Marshal Mohammad Tantawi, i bin kamap gen long bringim bek demokrasi na sivilian gavman bai ronim kantri bihain.

Em i tok tu olsem Egypt bai onarim tok orait bilong peace em i bin kamapim wantaim Israel.

Stat long ples em ol dispela protes i bin kamap long en, em long Tahrir skwea bilong kapitel Cairo, ol wok bilong klinim gen ples i stat pinis wantaim ol pipel em ol i bin stap inait long protes i bin kamap na helpim ol wok bilong rausim ol banis na tu rausim ol kar em paia i bin kamap long ol em ol i wok long silip nabaut long ol bik rot bilong siti.

Ol bisnis i stat long op gen isi isi na tambu ol i putim long pipel noken raun long nait – ol i stat long rausim em isi isi tu.

Tasol ol tenk na ol soldia i wok long patrol yet long ol strit bilong Cairo.

## Fiji bai bungim moa saiklon

WEDA opisa bilong Fiji, Amit Singh it bin tok i luk olsem bai gat moa saiklon i kamap long hap bilong Fiji. Mista Singh i bin tokim Fiji Televisen i kamap inap nau i gat ol saiklon i bin kamap pinis long sampela eria bilong Fiji.

Em i tok em i taim bilong saiklon yet na em i ting bai gat samting olsem 7 i go inap long 9-pela saiklon long dispela taim i go inap long mun Epril.



# Famili soim sore

**OL LAIN famili bilong ol lain turangu i dai long taim birua i painim wanpela bot i karim ol asailum sika. Samting olsem 50 manmeri i bin dai taim dispela bot i bungim taim nogut antap long ol ston na bruk. Dispela birua i bin kamap long Rocky Point long Christmas Ailan long Desemba 15 las yia.**

## Save the Children Fiji i bin helpim planti ol skul sumatin

LAIN bilong Fiji, em ol i kolim ol yet Save the Children's Fiji, i bin tok ol i bin helpim planti tausen praimer i na sekonderi skul pikinini long dispela yia.

Wanpela ripot i kam long Fiji, i bin tok Sif Eksekutiv Chandra Shekhar i bin tok ol helpim em lain bilong en i bin givim olsem long ol buks, pen na pensil, ol yunifom na ol arapela samting long helpim ol skul pikinini long skul bilong ol. Mista Shekhar i bin tok lain bilong em bai go het long givim helpim wanem ol pikinini em ol i nidim helpim long dispela yia.

## Strongpela guria long Tonga

WANTPELA strongpela guria inap long 6.1 long rikta skel i bin kamap aninit long solwara samting olsem 55 kilomita longwe long biktaun bilong Tonga, Nuku'alofa.

Jiolojikal Sevei bilong Amerika i bin tok nogat tok lukaut bilong sunami long dispela taim.

Dispela guria i bin kamap long not wes bilong dispela saut pasifik ailan na i bin kamap i kam long 81 kilomita aninit long

solwara na 290 kilomita longwe long nara-pela ailan bilong Tonga, Neiafu.

Na i no bin gat ripot long dispela taim long ol bagarap oa pipel i dai long en long dispela guria em i bin kamap 7 kilok moning lokol taim long Sande.

## Fiji i tambu long noken kilim ol bulmakau meri

LONG wanpela tingting long lukautim namba bilong ol bulmakau long Fiji em nau i wok long i go daun, Ministri bilong Agrikalsa i kamapim strongpela tambu long noken kilim ol bulmakau meri i go antap inap ol i kisim sampela moa toksave bihain.

Wanpela ripot i kam long Fiji i bin tok eking dairekta bilong animal helt na prodaksen i bin tok namba bilong ol bulmakau oa cattle i wok long i go daun insait long ol dispela yia i go pinis.

Dispela ripot i go get na i tok ministri bilong agrikalsa i wok long wari nau long wanem dispela bai inap bagarapim plen bilong Fiji gavman long daunim mak bilong bulmakau mit ol i save baim i kam long ol arapela kantri.

## Cardwell pipel long Not Kwinslen i belhat long ol MP

OL savaiva bilong Saiklon Yasi insait long Cardwell taun long not hap bilong Kinslen Stet bilong Australia i tokim ol MP i go long hap olsem ol i nidim moa helpim long mekim gut sindaun bilong ol.

Klinap wok long Cardwell i slo tru na i kamapim pinis planti kros.

Wanpela man bilong hap i tok sampela pipel i pilim olsem ol pipel i lus tingting long taun bilong ol.

Federal Tresera Wayne Swan, i bin bungim ol asples we em i tokim ol olsem dispela ol wari bilong ol i stret bikos ol i nidim bikpela helpim.

## Fiji i ripot long sik typhoid

OL ripot i kam long Fiji i tok ol i painim sik taifoit (typhoid) i kamap insait long Naitasiri distrik bilong Viti Levu ailan.

Moa long 100 pipel i bin go long haus sik we ol i sekim ol long dispela sik tasol ol i no save yet long namba bilong pipel wantaim sik.

Helt Minista bilong Fiji, Dokta Neil Sharma, i tok taifoit i save kamap oltaim insait long Fiji taim bikpela ren i kamap.

**Pacific BEAT**

4, 5, 6am & 4pm, 5pm  
including sport

Listen to Radio Australia  
101.9FM Port Moresby

Radio Australia current affairs programme which focuses on island nations, bringing you morning and evening coverage of Pacific current affairs including interviews with political leaders, newsmakers, and the people who make the Pacific beat.



# Ol memba kisim gutpela presen

I LUK olsem ol lain bin ronawe long Somare Gavman sampela taim go pinis bin i go bek na sindaun gut nau. Luk olsem ol mas kisim gutpela welkam na sampela gutpela presen tu ya.

Em pasin politiks bilong Papua Niugini bikos ol memba ken kalap kalap go kam o senisim sia long laik bilong ol long palamen.

Sampela lain memba husat bin bruk go na kam bek i tokaut long pablik olsem ol i sori na mekim bikpela tok sori long Gavman bilong Somare.

Sampela i autim bel nogut bilong ol long ol projek bilong ples we gavman i no helpim ol long givim mani. Olsem na ol mekim olsem long senisim gavman bai ol ken kisim helpim hariap long stretim ol projek bilong ol.

Ating wanpela bikpela askim em, bilong wanem as na ol go bek long banis bilong Somare? Ol em lida ya tasol wanem samting hukim



ol go bek?

Pait long kisim sevis na developmen go long ol pipel em wanpela bikpela as ol memba save tok pait long en long palamen. Tasol wanpela pasin nau em sapos yu lida bilong harim tok bilong gavman na bihainim em bai yu kisim helpim hariap. Sapos yu laik krangi liklik, bai mani bilong yu long mekim wok bai no inap kamaut hariap.

Planti memba bilong Sauten rijon bin bihainim olpela Praim Minista na memba bilong Abau Sir Dokta Puka Temu go long Oposisen long traime senisim gavman. Tasol gavman i no senis olsem na ol ron go bek gen na nau ol kisim bikpela welkam na stap gut nau.

Sampela memba bilong Pipels Eksen Pati (PAP) bin

bruk go tu long Oposisen tasol ol go bek we pati lida na memba bilong Maprik, Gabriel Kapris i welkam long ol na kisim ol bek. Wankain tu ol wanwan memba wok long go bek.

Long dispela as na gavman i bin sanap strong na sakim dispela salens bilong Vot nogat Bilip we i bin laik kamap long Novemba las yia. Dispela i soim tu olsem olgeta memba long gavman i amamas bikos Nesenel Baset bilong 2011 i karamapim ol gut.

Narapela samting tu em ating gavman bin harim tok na helpim ol dispela memba wantaim wari bilong ol. Ol lida ya laikim mani bilong ol kirapim ol projek na sevis long ilektoret bilong ol. Em bikpela wari bilong ol long kalap go long hapsait na kam bek gen.

Tok stret olsem 2011 em nogat taim moa bikos yu ken wokim projek tasol em leit ya. Sampela projek bai kisim moa long tupela o

tripela krisman long pinisim. Nau em taim bilong givim ol liklik bel kol na amamas mani o projek tasol long ol famili, sios grup, bisnis grup na ol ples wanwan. Em isi bikos nogat taim moa long wokim ol bikpela projek olsem rot, skul, haus sik, bris, polis stesin na ol arapela moa.

Tru tumas bikpela baset bilong 2011 i mas inapim tru olgeta memba olsem na nogat man i kros na mekim nois nau. Bipo ol Gavana save kros bikos skel bilong mani long provins bilong ol i no save inap. Wankain tu long ol minista. Tasol nau, nogat memba o gavman o minista i agensim baset bilong gavman.

Yumi ken tok olsem, ating 2011 em mas kempen baset ya bilong amamasim ol memba na ol ken yusim long mekim planti wok long ples long traime grisim na pulim sapot na winim bek sia bilong ol long 2012 nesenel ileksen.

## WANTOK KOMENTRI

### 'Dring olsem waitman na spak olsem kanaka'

DISPELA hap toktok, em planti manmeri i save tromoi taim ol i lukim wanpela man PNG i spak long tripela o foapela botol bia tasol.

Em i wanpela tru tok, long yumi ol PNG olsem yumi no save long dringim gut bia long we bilong dring bia?

Bikpela kibung i kamap dispela wok long Mosbi i tok pait na glasim ol hevi we bia na alkohol, wantaim spak brus, i save kamapim long komyuniti.

Ol dispela hevi em yumi olgeta i save long en pinis.

Hevi bilong ol mama i karim han bilong papa bihain long em i go spak nogut tru na kam bek long haus.

Bia i save mekim man i pilim kros na i save belhat klostu klostu. Em i save mekim man i slip taim em i draivim kar, na em i save mekim ol yangpela i bagarapim gutpela laip bilong ol taim ol i stat long lukim bia olsem wanpela samting bilong kisim olgeta taim.

Planti samting i kamaut long dispela kibung, we ating yumi olgeta long kantri i no save. Ol samting olsem: i nogat wanpela loa i stap long bosim pasin bilong dring bia, na ol rot bilong abrusim, o banisim yumi yet long ol hevi bilong bia.

Wanpela dokta bilong Hagen Jeneral Haus sik, i tokaut tu olsem haus sik i save lusim klostu namel long K2000 na K15,000 long wan wan manmeri i kamap long haus sik, bikos em i bungim birua long kar we wanpela spak man i draivim, o bamim.

Dispela hap mani em ol i save lusim, na bihain, em i save sotim ol long ol arapela wok bilong ol long haus sik.

I gat toktok tu i kamaut long dispela kibung olsem i gavman i mas go pas long sanapim wanpela komiti bilong glasim ol hevi bilong bia na stiaim gavman long ol wok bilong daunim namba bilong ol birua i save kamap long bia na spak pasin.

Ating i mobeta, olsem ol lain husat i save mekim na salim bia, em SP Breweri yet, i mas wokbung wantaim helt dipatmen na kamapim ol tok stia bilong toksave long ol manmeri olsem bia em samting bilong dring isi isi, na long mak. I no samting bilong dring inap bel bilong yu no inap kisim moa, o inap olgeta tingting bilong yu i lus na yu mekim kain kain pasin nogut.

Yumi mas lusim dispela pasin bilong dring bia olsem tru bai bia i pinis tumora tasol.

## WANTOK

Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea

Telephone: (675) 325 2500

Fax: (675) 325 2579

Email: [editorial@wantok.com.pg](mailto:editorial@wantok.com.pg)

Pe bilong wanpela yia 52 niuspepa

<b>Ples:</b>	<b>Air:</b>
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager Elizabeth Konga

Editor Neville Choi

Published at Section 58, Allotment 3 Office 2, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

# YU NO PILIM SEIF? TOK NOGAT GO DAUN NA GO

# EM I NO WANPELA GEM



Rot Sefti em wanpela bikpela samting insait long PNG wantaim planti ol birua na bagarap i save kamapim planti dai. Olsem na sapos yu no pilim seif olsem wanpela pasindia – tok nogat, go daun na go. Sapos draiva i dring, spit tumas na i no lukluk long ol manmeri yusim rot o em i pulapim kar, yu gat rait long tok nogat na go daun na go. Yu ken sevim laip bilong yu yet na ol arapela manmeri. Em taim nau long tingting strong long ROT SEFT – em i no wanpela PILAI

**ROT SEFTI  
em ino wanpela  
PILAI**

A road safety initiative by Motor Vehicles Insurance Ltd

## Julia kisim Maori tok welkam

PRAIM Minista bilong Australia, Julia Gillard i mekim 'hongji' o tok welkam pasin bilong ol Nu Silan, we ol i save pasim nus na pes wantaim arapela long tok amamas long ol i kam raun. Long dispela poto, Prait Minista Gillard i mekim hongji wantaim Tamati Patuwai, taim Misis Gillard i bin raun i go lukim Glen Taylor skul long Oklen (Auckland), Nu Silan long Februari 15, 2011.



## Protesters flee police

OL PROTESTA long Bahrain i ronawe long ges ol polis i paiarim long ronim ol man bai ol i noken bung long wanpela ples Sanabis, klostu long Manama long Mande. Ol i bin kros na protes bihain long toksave bilong protes i bin go aut long Facebook.



## Ol iligel imigren i kamap sua long ol ailan long Itali

WANPELA fising bot i pulap wantaim ol iligel imigren bilong ples Tunisia long not Afrika i kamap long sauten ailan long Itali, em ailan Lampedusa long Februari 13.



## Laitning paitim graun

WANPELA bolt laitning i paitim graun klostu long ples Coober Pedy long noten Saut Australia long wanpela bikpela ren na win i bin kamap.

# CPL Grup sapotim

James Kila i raitim

"YUMI mas halivim olgeta meri, olgeta taim". Dispela em het-tok we progrem ol i kolim "Meri Seif Ples" i save yusim long strongim wok bilong en .

Meri Seif Ples i kam aninit long Yumi Lukautim Mosbi (YLM) long daunim na stopim pasin bilong man i paitim meri.

Olsem na sapos yu wanpela meri i bungim hevi taim man bilong yu i paitim yu, yu ken go tasol long wanpela CPL Grup riteil stua long Mosbi na askim ol long helpim yu long ring tasol i go long dispela namba "7222 1234" long kisim helpim.

CPL long las wik Fraide i tokaut olsem em i redi tasol long helpim na daunim pasin bilong paitim meri na em i sapotim dispela gutpela progrem bilong Yumi Lukautim Mosbi em ol i kolim "Meri Seif Ples".

Sapos wanpela mama i raun klostu long wanpela CPL Grup stua na man bilong em i laik paitim em, em i ken go hait na kisim helpim i kam long ol wokman meri bilong CPL.

Wanpela meri husat i makim ol wok lain bilong CPL Grup, Lindy Anton i tokaut olsem ol wok-meri bilong City Pharmacy Grup (CPL) i bin sevim sampela ol mama husat man bilong ol i laik paitim ol insait long stua. Ol wok-meri i helpim ol long ringim polis long sevim dispela ol mama long noken kisim bagarap long han bilong ol man bilong ol.

Em i tok CPL Grup i amamas tasol long sapotim Meri Seif Ples na wok wantaim dispela gutpela progrem ol i kolim "Yumi Lukautim Mosbi" long sait bilong strongim na lukautim ol meri.

Mis Anton i tok em i amamas tru long stap wantaim CPL Grup we i soim strong na givim sapot i go long

CPL Grup em wanpela bikpela riteil stoa net-wok insait long Papua Niugini na long dispela yia em i givim sapot bilong en i go long Meri Seif Ples Progrem.

CPL i bin tokaut long helpim bilong en long las wik Fraide long Stop n Shop sentral Waigani fran long ol bikman bilong CPL, ol wokman bilong Lo na Jastis Sekta (LJSS) na ol memba bilong Semba ov Komes.

CPL Grup i save strong long sapotim wok long strongim ol meri insait long komyuniti. Wanpela komyuniti sevis pro-



Dorothy Nathan i werim 'Meri Seif Ples' t-siot na amamas long sevim kastoma Grace Siki long Stop N Shop Sentral Waigani.



Oi CPL Grup meri long Sentral Waigani givim sapot long Meri Seif Ples

# 'Meri Seif Ples'

grem em i save sapotim olgeta yia em "Pride of PNG" Awot bilong ol meri na dispela i save givim luksave long ol meri insait long komyuniti husat i mekim ol gutpela samting longh sevim komyuniti na ol manmeri bilong Papua Niugini.

Narapela gutpela samting tu em CPL Grup i mekim olsem ol stua bilong en insait long kantri i ken helpim ol meri husat em man bilong ol i paitim ol na ol i painim ples long hait long birua i kamap. Ol dispela stua i givim ples long ol meri i ken hait sotpela taim inap Stoa Menesa bilong CPL o ol lain wokman meri i ringim Meri Seif Ples hot-lain long go kisim ol dispela meri na helpim ol.

CPL Grup em bikpela riteil stoa netwok insait long Papua Niugini. Em i gat nem pinis long kamapim 4-pela strong-pela riteil bren stua olsem City Pharmacy, Stop N Shop, Hardware Haus na Boncafe.

Dispela ol riteil stoa netwok bilong em i givim sevis long sait bilong helt na bilas gut, groseri, hadwea stoa na kofi sop.

Long las yia (2010), CPL i gat olsem 49 stoa insait long riteil operesen bilong en long PNG na i gat moa long 2,000 wokman meri. Insait long dispela namba 95-pesen em ol lain bilong Papua Niugini stret.


Mis Anton wantaim ol wok meri bilong CPL long Sentral Waigani i bung na i apim han na tok strong olsem ol i sapotim wok bilong Meri Seif Ples.

Em i tok CPL Grup i bin joinim dispela program long 2008 na i soim olsem em i sanap redi long helpim ol meri insait long komyuniti.

"Mi yet mi tingim moa long 12-pela taim we ol wan wok bilong mi i helpim sampela meri husat i kam long mipela long kisim helpim taim man bilong ol i laik paitim ol taim ol i raun baim kaikai insait long stua bilong mipela," Mis Anton i tok.

Em i tokaut tu olsem ol i kisim sampela tok pret i kam long ol bikhet lain long komyuniti, tasol menesmen bilong ol i sanap strong na go het long sapotim dispela program.

Mis Anton i askim olgeta man na meri long Papua Niugini long soim rispek o givim luksave long ol meri na kam joinim han wantaim CPL Grup na YLM long kain gutpela komyuniti sapot program olsem Meri Seif Ples na rausim pasin nogut long paitim meri.



Lindy Anton i yusim mobail fon na i soim namba bilong "Meri Seif Ples" long helpim ol mama husat i bungim hevi. *Poto: Nicky Bernard.*



Wok meri bilong Stop N Shop Mary Maihua i sapotim Meri Seif Ples.



Ol wokmeri bilong CPL Grup sentral Waigani i bung wantaim na amamas long sapotim Meri Seif Ples program. *Poto: Nicky Bernard.*



Program bilong Wanwan De

De - Mande - Fraide

6am - 10am - Sankamap show - Host: Kas. T
6:00am - Major Nius Bulletin
6:15am - Komuniti Notis Bod
6:25am - Taim Bifo - wanpela singsing b'long bifo.
6:30am - Nius Hetlains
6:45am - Bonde grifins
7:00am - Major Nius Bulletin - YUMIFM Nius Senta
7:05am - YU TOK - komiuniti awenes program
7:15am - WAN 4 DA ROAD - Hit Prediction
- niupela singsing
7:30am - Tok Pilai - stori b'long putim smail long nus pes.
8:00am - Major Nius Bulletin - YUMIFM Nius Senta
8:05am - YU TOK - komiuniti awenes program
8:15am - "Papa Heni Fuka Show".
9:00am - Nius Bulletin - YUMIFM Nius Senta
9:15am - Luksave long komiuniti (Redio Pilai) Fraidei

Tasol
9:30am - Final aua cruz
10am - 3pm - Morin Trek na Belo Pack
- Host: Mummy DASH
10:00am - Major Nius Bulletin - YUMIFM Nius Senta
10:05am - YU TOK - komiuniti awenes program
10:15am - Kona b'long yu.
10:45am - YUMI PANIM WOK Segment
11:00am - Nius - YUMIFM Nius Senta
11:05am - YU TOK - komiuniti awenes program
11:10am - Lukautim yu yet - Helt toktok
11:30am - Nius Hetlains b'long Belo Taim
- Laik b'long yu - Niupela singsing previu
12:00pm - Major Nius Bulletin - YUMIFM Nius Senta
12:05pm - YU TOK - komiuniti awenes program
12:10pm - BELO Pack - Belo taim rekwas na dedikesen
12:15pm - Komuniti Notis Bod
12:20pm - BELO Pack - Belo taim rekwas na dedikesen
1:00pm - Nius - YUMIFM Nius Senta
1:05pm - YU TOK - komiuniti awenes program
1:10pm - BELO Pack - Belo taim rekwas na dedikesen

2:00pm - Major Nius Bulletin - YUMIFM Nius
2:05pm - YU TOK - komiuniti awenes program
2:45pm - YUMI PANIM WOK Segment
3pm - 7pm - Avinun Draiv Taim - Host: Vaviessie
3:00pm - Nius - YUMIFM Nius Senta
3:05pm - YU TOK - komiuniti awenes program
3:10pm - Avinun cruz
4:00pm - NIUS - YUMIFM Senta
4:05pm - YU TOK - komiuniti awenes program
4:10pm - FOAPELA KAM GUD LONG 4 - foapela singsing
4:30pm - Nius Hetlains
4:45pm - YUMI PANIM WOK Segment
5:00pm - Major Nius Hetlains - YUMIFM Nius Senta
5:05pm - YU TOK - komiuniti awenes program
5:10pm - 6:00pm - KULCHA Musik (1 hr) skelim lokal musik
6pm - 7pm - NAIT BEAT - Host: Vaviessie
6:00pm - MAJOR NIUS BULLETIN - YUMIFM NIUS Senta
6:05pm - YU TOK - komiuniti awenes program

6:10pm - 7:00pm Mon kamap sho
6:45pm - Komuniti Notis Bod
7:00pm - 9:00pm - COCA COLA GARAMUT
- Host: Angra Kennedy
7:00pm - Nius - YUMIFM NIUS SENTA
7:05pm - YU TOK - komiuniti awenes program
9:00pm - 00am - Nait Beat - Isi Cruz long nait
00am - 6am - BRUKIM TULAIT SHOW - Host: Tuluvan
00:00 - Early Monin Taim Cruz (ol lain brukim tulait shift)
- Musik / Request / Tok pilai
- Kipim Kampani long ol nait shift.
Wikens - Sarere
6am - 10:00am - Wilken Sanrais Host: Talaigu Sopi
7am - 9am - Sarere Monin Cruz
9am - 11am - Monin Treks
11am - 1pm - National Weekly Hit Parade - Host: Kasty - 1st aua NWHP
12:00pm NIUS - YUMIFM Nius Senta
12pm - 1pm - 2nd aua NWHP

Sarere belo cruz - Host: Tuluvan Vitz
1pm - 2pm - Sarere Belo Taim Dedikesen
2:00pm NIUS - YUMIFM Nius Senta
2pm - 6pm - Sarere Avinun Cruz
6:00pm NIUS - YUMIFM Nius Senta
6pm - 00:00am - Nait beat
7pm - 9pm - Coca Cola Garamut
9pm - 00:00am - Nait cruz
00:00am - 6am - Brukim Tulait Show
Wikens - Sandei
6am - 10am - Wilken Sanrais / Sandei Monin wokabout Musik
- Monin Treks
10am - 12noon NIUS - YUMIFM Nius Senta
12noon - Sandei Belo Taim Music
12 - 2pm NIUS - YUMIFM Nius Senta
2:00pm - Sandei Avinun Draiv Music
2pm - 6pm - Nius - YUMIFM Nius Senta
6pm - 8pm - GOSPEL REKWES AUA
8pm - 00:00am - Late Nait Cruz - Poroman Aua
00:00am - 6am - Brukim Tulait Show
Program Director - YUMIFM - Kasty

RADIO AUSTRALIA TOK PISIN PROGRAM HARIM LONG: 101.9 FM

6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Spots
7.30PM Nius na Karen Afeas
8PM Helt
8.15PM Musik
8.30PM NIUS
8.40PM Spots Riplei
8.55PM Musik
9PM Stesen Pas

TUNDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karen Afeas
8PM Mama Graun
8.15PM Musik/Spots
8.30PM NIUS
8.40PM Helt Riplei
8.55PM Musik
9PM Stesen Pas

TRINDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karen Afeas
8PM Focus
8.15PM Musik/Spots
8.30PM NIUS
8.40PM Mama Graun Riplei
8.55PM Musik
9PM Stesen Pas

FONDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karen Afeas
8PM Youth
8.15PM Musik/Spots
8.30PM NIUS
8.40PM Focus Riplei
8.55PM Musik
9PM Stesen Pas

FRAIDE - Moning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karen Afeas
8PM Wantok
8.15PM Musik
8.30PM NIUS
8.40PM Youth Riplei
8.55PM Musik
9PM Stesen Pas

SARERE - Nait
7PM Stesen op - Ol Nius Hetlain/Program Priviu
7.05PM Musik na Chit Chat
7.30PM Nius
7.40PM Wantok
8PM Lokal Ben
8.30PM Nius
8.40PM Musik/Chit Chat
9PM Stesen Pas

SANDE - Nait
7PM Stesen op - Ol Nius Hetlain/Program Priviu
7.05PM Musik na Chit Chat
7.30PM Nius
7.40PM Femili Blong Serah (Redio Plei)
8PM Lukluk Bek Long W'ik
8.30PM Nius
8.40PM Musik/Chit Chat
9PM Stesen Pas

Raun wantaim Wantok kru ...

'Stop n Shop' pikinini pilai graun gat stail

Nicky Bernard i raitim

BIKNEM stoa long Mosbi, Stop N Shop, nau i gat ples bilong ol mangi o ol pikinini long pilai. Dispela liklik hap Stop N Shop i mekim bilong ol pikinini i pilai na wetim papamama i go mekim soping.

'Stop N Shop' em wanpela bikpela stoa we ol save salim ol kaikai long en, na tu i gat City Pharmacy insait long en. Dis-

pela stoa save pulim planti manmeri long go mekim soping, na taim ples i pas, ol papamama save painim hat long holim ol pikinini, olsem na ol i kamapim dispela tingting long putim ples bilong ol pikinini long pilai na mekim isi long ol papamama yet long go painim kaikai.

I gat 5-pela Stop N Shop insait long Mosbi, tasol i no olgeta i gat dispela liklik pilai graun bilong ol pikinini, tripela

stoa tasol i gat, em Stop N Shop Sentral Waigani, Not Waigani na Gerehu tasol i gat.

Planti pikinini nau i save laikim tru ol papamama mas go baim ol kaikai bilong ol long dispela stoa long wanem long dispela pilai ples tasol.

I gat siso, ples bilong

wel i go daun, ples bilong tanim tanim na sampela moa, ol pikinini krismas bilong ol stat long tu (2) na go long 5-pela krismas tasol bai ken pilai long dispela pilai ples.

Wantok Niuspepa i askim sampela bilong ol papamama long dispela pilai graun na ol i tok,

'Stop N Shop' i kamapim gut pela tingting long putim dispela pilai ples, ol pikinini bai no inap bihainim mipela go insait long stoa na pasim han bilong mipela long mekim soping na tu ol bai no inap krai long ol kainkain samting insait long stoa," Ol i tok olsem.

93FM YUMIFM National Weekly Hit Parade: Sponsor: Digicel - bigger, better network. Produced & Host by: Kasty. Statistics: Talaigu Sophie & Poroman Crew. Week Ending: Saturday - 19th February 2011. Table with columns: Week Before, Last Week, This Week, Charting Song, Artist.



LIKLIK PILAI HAP: Nau yu raun go long olgeta stua bilong Stop 'n' Shop, bai yu lukim liklik hap ples bilong ol pikinini i ken pilai. Liklik haus we ol pikinini i ken sindaun o wel i kam daun na liklik meri go raun we ol pikinini i ken tanim tanim igo i kam. Wok bilong ol papamama em go mekim soping bilong ol insait long stua. Foto: Nicky Bernard

EMTV Television Guide

FONDE, FEBRUERI 17 2010

5.00AM G ENJOYING EVERY DAY LIFE with JOYCE MEYER Religious Program
5.30AM G TODAY
11.00AM AUSTRALIA NETWORK
2.59PM STATION OPEN
KIDS KONA
3.00PM G MAGICAL TALES
3.30PM G HI-5
4.00PM G THE PYRAMID
4.30PM G THE SHAK
5.29PM G EMTV NEWS UPDATE
5.30PM G MILLIONAIRE HOT SEAT
6:00PM G NATIONAL EMTV NEWS
6.30PM G A CURRENT AFFAIR
7.00PM G SPORTS SCENE (2011 Return)
7.30PM PG RAIT MUSIK
7.27PM G EMTV TOK SAVE
7.30PM G RAIT MUSIK
8.30PM PG ELITE MUSIC ZONE

(2011 Return)
9.00PM PG WWE AFTERBURN
10.00PM PG CRUSOE
11.00PM G NATIONAL EMTV NEWS REPLAY
10.30PM G NEWS REPLAY
11.00PM AUSTRALIA NETWORK
FRAIDE, FEBRUERI 18 2010
5.00AM G ENJOYING EVERY DAY LIFE with JOYCE MEYER Religious Program
5.30AM G TODAY
11.00AM AUSTRALIA NETWORK
1.55PM AUSTRALIA NETWORK
2.59PM STATION OPEN
KIDS KONA
3.00PM G MAGICAL TALES
3.30PM G HI-5
4.57PM EMTV TOK SAVE
5.00PM G HOT SOURCE
5.29PM G EMTV NEWS UPDATE

5.30PM G MILLIONAIRE HOT SEAT
5.55PM G CRIME STOPPERS
6:00PM G NATIONAL EMTV NEWS
4.30PM G THE SHAK
4.57PM EMTV TOK SAVE
5.00PM G HOT SOURCE
5.29PM G EMTV NEWS UPDATE
5.30PM G MILLIONAIRE HOT SEAT
5.55PM G CRIME STOPPERS
6.00PM G NATIONAL EMTV NEWS
6.30PM G A CURRENT AFFAIR
7.00PM G IN MORESBY TONIGHT (2011 Return)
7.27PM EMTV TOK SAVE
7.30PM G SUPER RUGBY
HURRICANES v HIGHLANDERS
9.30PM G SUPER LEAGUE
ST. HELENS v WIGAN / BRADFORD v. LEEDS
10.40PM G EMTV NEWS REPLAY
12.20PM AUSTRALIA NETWORK

SARERE, FEBRUERI 19 2010
7.00AM G HILLSONG
7.30AM.....AUSTRALIA NETWORK.....
1.00PM G
5.00PM G JAPAN VIDEO TOPICS
5.30PM G THE RACING YEARS
6.00PM G NATIONAL EMTV NEWS
6.30PM G LOVE PATROL
7.00PM PG SEND IN THE DOGS (New Series)
7.30PM G 60 MINUTES
8.30PM M SUNDAY NIGHT MOVIE: THANK GOD IT'S FRIDAY (1978) Comedy/Musical - It's Friday and everyone is going to the hot disco. The Commodores are schedule to play if Floyd shows up with the instruments and Nicole dreams of becoming a disco star. Other characters are there to win the dance contest, or to put a little excitement into a fifth anniversary. Stars: Donna Summer, Paul Jabbara - Academy Award Winner
10.30PM G HILLSONG
11.00PM G NATIONAL EMTV
6.29AM STATION OPEN
6.30AM G IT IS WRITTEN

12.00AM AUSTRALIAN NETWORK
SANDE, FEBRUERI 20 2010
6.29AM STATION OPEN
6.30AM G IT IS WRITTEN



TORO



BIABIA



KANAGE



TOKWIN

Moa Aweanes long Alkohol hevi

Moa aweanes i mas kamap long ol rurel ples na ol setelmen long kantri long hevi bilong alkohol o pasin bilong dring bia. Planti lain save amamas long dring tasol ol i no save olsem planti hevi save stap long alkohol. Moabeta ol man mas dringim gut bia na bia noken dringim ol na bagarapim het blong ol.

BLEK AUT PNG

Mosbi Siti i wok long kisim blek aut klostu klostu, wanpela nait long 6 kilok avinun, blek aut i stap long sait bilong Gerehu na i no kam bek hariap inap 8:30pm o 9 kilok nait. Planti ol pikinini save wetim taim lait i kam bek bai ol bik maus long welkamim lait long kam bek. Wanpela liklik mangi krismas bilong 10, em wok long toktok long bubu bilong em long Manus long mobile bilong papa bilong em stap. Sem taim tu pawa o lait i kam

bek, em laik welkamim lait tasol em toktok yet long mobile wantaim bubu meri bilong em, olsem na em isi tasol askim bubu bilong em, Pawa o lait bilong yupela tu kam on o nogat, bubu bilong em paul na askim em gen long wanem samting em toktok long en. Papa bilong em harim em na em tok pikinini man bilong em, yumi stap long Mosbi na bubu stap long Manus, pawa bilong Mosbi i no go long Manus, paul wanpela taim tasol inap.

Tokwin Tasol...

Word search grid with letters A-Z arranged in a 15x15 grid.

Painim ol toktok bilong Lo na Oda

Table with 4 columns and 4 rows listing names: POLIS, LIDASIP KOT, ASUA, LIDA, FROD SKWAT, TRANSPARENSI, WOK PASIN, STILMAN, PAULIM MANI, GRISMANI, HAITMANI, MAMA LO, OMBUDSMAN, GUTPELA BEL, MEKIMSAYE, KORAPSEN, GIAMAN, AKAUNTABILITI, KLIA WOK PASIN, ABRUSIM MAK.

9x9 Sudoku grid with some numbers filled in.

8x8 Ansa bilong las wik Sudoku grid with some numbers filled in.

Ansa bilong las wik Sudoku

Ansa bilong las wik Pasol

15x15 Ansa bilong las wik Pasol grid with some letters filled in.

EMTV Television Guide

Television guide table with columns for time, channel, program name, and genre. Includes programs like NEWS REPLAY, JOYCE MEYER, TODAY, EMTV NEWS UPDATE, NATIONAL EMTV NEWS, A CURRENT AFFAIR, HAUS & HOME, EMTV TOK SAVE, RESCUE SPECIAL OPS, COPS L.A.C., THE PYRAMID, THE SHAK, MILLIONAIRE HOT SEAT, SEA PATROL, 20 TO 1, NATIONAL EMTV NEWS REPLAY, AUSTRALIA NETWORK, MAGICAL TALES, HI-5, THE PYRAMID, THE SHAK, EMTV NEWS UPDATE, MILLIONAIRE HOT SEAT, NATIONAL EMTV NEWS, A CURRENT AFFAIR, RANDOM ACTS OF KINDNESS, RPA - Where Are They Now?, DEPARTMENT OF EDUCATION CLASSROOM BROADCAST, AUSTRALIA NETWORK, JOYCE MEYER Religious program, TODAY, EMTV PRIME TIME LINE UP, DEPARTMENT OF EDUCATION CLASSROOM BROADCAST, KIDS KONA, AUSTRALIA NETWORK, JOYCE MEYER Religious program, TODAY, EMTV PRIME TIME LINE UP, DEPARTMENT OF EDUCATION CLASSROOM BROADCAST, KIDS KONA, AUSTRALIA NETWORK, THE WORLD AROUND US, NATIONAL EMTV NEWS REPLAY, AUSTRALIA NETWORK, JOYCE MEYER Religious Program, TODAY - AUSTRALIA v EMTV PRIME TIME LINE UP, DEPARTMENT OF EDUCATION CLASSROOM BROADCAST, KIDS KONA, EMTV TOK SAVE, MILLIONAIRE HOT SEAT, CRIME STOPPERS, NATIONAL EMTV NEWS, A CURRENT AFFAIR 00PM, THE WORLD AROUND US, Zac Efron and Friends: School's Out, School's Out charts the meteoric rise of Zac Efron, from a school kid who had to chase girls to get them to go out with him to the heart throb he is today, adored by millions of 13 year olds around the world (and some of their mums!). Of the case of High School Musical, the actor most likely to enjoy a career outside of Disney's most famous fran-

OI Progam na Taim i ken senis...

## Raun wantaim Kanage olgeta wik

### Kanage na tripela tait

Wanpela taim Kanage i tanim redio bilong em on na i harim nius i stap. Long nius i tok i gat tupela haiwara i wok long kamap long solwara. Em i hai tait na lou tait. Orait, Kanage i harim dispela nius na em i go long toksave long ol manmeri long maket ples. Kanage i singaut, toksave i go long yupela olgeta olsem yumi nau yumi gat tripela tait we i save kamap, husat i save long ol dispela tait? Ol manmeri i pasim maus na harim em i stap. Kanage i bel-hat long ol i no ansarim em, em i kirap na i singaut yumi gat tripela tait. "Em i hai tait, lou tait na kok tait". Nau yupela i save pinis, onim radio bilong yupela na harim ol nius.

TK  
Mangi Sunam

### Paul long kisim rait bag

Kanage em bilong ailan long notwes kos bilong Sunam. Wanpela taim em i laik go huk, na em i gat tupela wankain bag. wanpela em bilong ol klos na narapela em i save putim ol string o pising



lain bilong em insait. Em i lusim string bek na i karim bek I gat klos i go long kanu na pul i go longwe long ples.

Em i kamap pinis long namel bilong solwara na i tingting long tromoi huk, em i karim bek bilong em na i stat long painim ol string na em i lukim ol klos i stap insait, Paps em i bel hat na pul i kam bek long ples.

TK  
Mangi Sunam

### Mi no save long tok pisin

Kanage i save stap long Mosbi. wanpela wiken, boi kalap long balus na go long Rabaul. Em i go long lukim ol bagarap maunten paia i kamapim. Balus i go kamap long Rabaul ples balus na Kanage lusim balus na go ausait. Em i lukim wanpela yangpela meri Tolai i sanap ausait long teminel na em i askim meri long tok Inglis olsem,

"Hey lady, is this Rabaul town"

Meri Tolai kirap na bekim. "Em nau." Kanage paul na askim gen na meri ya i mekim wankain toktok. Kanage belhat na tokim dispela yangpela meri Tolai olsem, "Oh no. it seems that she is trying to trap me. This is not Rabaul. Em i tok olsem pinis na kalap long balus na go bek long Mosbi.

Samting tru i olsem Kanage i no save long tok pisin. Em i save long tok Inglis tasol. Watpo? Bikos em i bilong Papua yah.

Lapun Hookworm  
Lae

### Ol skwat!

Salim ol gutpela Kanage

tok pilai i kam long:

Kanage Tok Pilai

P.O. Box 1982,

Boroko, NCD

Port Moresby.

Email: atolire@wantok.com.pg

# Paul pasin wantaim meri bilong brata

### Dia Laiplain,

Mi WOKIM paul pasin na slip wantaim tambu meri husat i maritim brata bilong mi. Mitupela i gat bikpela laik long mipela yet. Tambu bilong mi i tok man bilong em i no save givim em inap mani long baim ol klos na ol narapela samting moa. Tasol mi tu I no inap long sapotim em bikos mi nogat wok.

Em i gat bel nau wantaim bebi bilong mi na em i laikim bai mitupela i ronawe i go long narapela provins. Mi wanbel long dispela. Man bilong em, brata bilong mi, i no save long wanem samting i wok long kamap. Olsem wanem, bai mi tokim brata bilong mi na famili bilong mipela o ronawe wantaim meri ya na bebi. Plis helpim mi!

### WHAT CAN I DO?

#### Dia Pren

Tenkyu long serim wari na hevi bilong yu wantaim mipela. Mipela i bilip olsem yu luksave olsem yu stap long hevi na yu laikim helpim long traim stretim.

Pren, yu bihainim raitpela rot long stretim pasin i no stret bilong yu. Mipela i luksave long pilings bilong yu taim yu lukim samting i kamap na yu givim bel long tambu bilong yu.

Pren, i gat planti as tingting watpo kain samting olsem i kamap na yu yet i save watpo yu wokim kain samting wantaim meri bilong brata bilong yu. Yu tok olsem tambu meri i tokim yu olsem brata bilong yu i no givim em sampela samting em i laikim. Na yu yet tu i no inap long givim em ol dispela samting. I moabeta yu stap isi liklik na tingting olsem watpo na long wanem as yu go insait. Ating yu ken askim yu yet tu sapos yu helpim tambu bilong yu taim yu slip wantaim em. O yu bin inap long abrusim em na toktok long brata bilong



yu long ol wari bilong meri bilong em. Na yu yet? Meri ya i tok tru? Em i tru olsem brata bilong yu i no lukautim em gut long ol samting em i laikim long en?

Yu tokim mipela olsem em i laik ronawe wantaim yu i go long narapela provins. Yu ken ronawe wantaim em tasol dispela inap long stretim hevi? Yu luksave tu olsem pasin yu mekim wantaim tambu bilong yu bai bagarapim famili bilong yu? Yu no wok na bai yu lukautim em na bebi olsem wanem? Narapela samting tu em, brata bilong yu i ken kisim yu i go long kot long slip wantaim marit meri na bai yu go long kalabus.

Laiplain i agensim ol marit i bruk o long manmeri i wokim pasin nogut olsem paul wantaim marit man o meri o givim bel long narapela i marit pinis. Tasol mipela i save helpim pipel i luksave long ol hevi bilong ol na givim ol stia long wokim senis long gutpela bilong ol na ol lain i stap klostu long ol.

Pren, yu yet yu save long wanem kain em brata bilong yu. Wanem samting bai kamap sapos brata bilong yu i painim aut long samting yu na meri bilong em i wokim? i gat narapela lain long famili bilong yu husat i ken helpim yu wantaim hevi yu gat long en? O i gat wanpela sios pasto yu save long en husat yu ken lukim em long helpim yu? I moabeta yu kisim helpim na stiatok long husat kain man olsem i ken helpim yu long kain hevi yu stap long en.

Mipela i luksave olsem em i bai hat, tasol yu mas sanap strong. Baibel i tok long Galesen 6:7, "Noken giamanum yu

yet, nogat man i save pilapilai long God. Wanem samting yu planim, em yu kisim kaikai bilong em". Pren, sapos yu lukluk gut long dispela, bai yu kisim ol samting we yu yet i planim.

Samting yumi wokim long graun i gat ol pe bilong em. Moabeta yu stop liklik taim na tingting gut. Pren, em i no leit tumas long senis. Moabeta yu bilip long God. Proverbs 3:5-6. Em i save wanem samting i wok long kamap na em i ken soim yu ol rot long helpim we yu ting olsem i no stap. Dispela em bikos em i kea o laikim yu tumas. Nogat man inap pogivim yumi, tasol God i ken. Ritim 1 John 1:9.

Em bai i no isi tasol yu kisim namba wan step long painim rot long stretim hevi na mipela i bilip olsem yu ken daunim. Mipela i bilip olsem yu luksave pinis long samting yu mekim i no stret nakikbek bilong em tu. Long abrusim moa traim, i moabeta yu lusim brata bilong yu na meri bilong em na yu go stap wantaim sampela narapela hauslain bilong yupela taim yu painim rot long stretim hevi yu gat long en.

Moabeta tu yu kisim kaunseling long wanpela pasto o Laiplain.

God i ken stiaim yu gut taim yu mekim ol disisen.

Pren bilong yu  
Laiplain

Sapos yu gat wari, rait i kam long Lifeline, P O Box 6047, Boroko, NCD. Telipon: 3260011. Raitim trupela nem na etres bilong yu na bai mipela i ken salim bekim long pas bilong yu. Bai mipela i no inap putim trupela nem bilong yu long stori.

Laiplain



NEM: Ludwig Hesai

KRISMAS: 21 (man)

ADRES: Kilipau village, P.O. Box 96, Vanimo, Sandaun Provins

SAVE LAIKIM: Senisim Presen, pilai soka, harim musik na raitim pas.

NEM: Benjamin A. Wep

KRISMAS: 20 (man)

ADRES: Kilipau Village, P.O Box 96, Vanimo, Sandaun Provins

SAVE LAIKIM: Pilai soka, voli bol, senisim presen na painim wanpela meri long maritim.

NEM: Patrick Gisiye

KRISMAS: 20 (man)

ADRES: New Century Wholesale, P.O.Box 218, Kiunga Western Provins

SAVE LAIKIM: Pilai soka, mekim pren, raitim pas, go lotu na senisim presen.

NEM: Benuel Kapamai

KRISMAS: 18 (man)

ADRES: P.O. Box 2901, Lae

SAVE LAIKIM: Pilai soka, volibol, pilai gita, harim musik, ritim buk na go lotu

NEM: Bainy Wou

KRISMAS: 20 (man)

ADRES: Kilipau Village, PO Box 96, Vanimo Sandaun Provins

SAVE LAIKIM: Raitim pas, senisim presen, pilai soka, volibol na painim wanpela meri long maritim.

NEM: Benny Wagu

KRISMAS: 18 (man)

ADRES: Kilipau Village, P.O.Box 96 Vanimo Sandaun Provins

SAVE LAIKIM: Senisim presen, raitim pas, pilai soka, volibol na harim musik

NEM: Terence Mathew

KRISMAS: 16 (man)

ADRES: Ohu Primary School, PO Box 169, Madang511, Madang Provins

SAVE LAIKIM: Go skul, harim musik, go Lotu, raitim pas na mekim pren

NEM: Tenny Paul

KRISMAS: 19 (man)

ADRES: Komabea Primary school, PO Box 220, Kerema, Gulf Provins

SAVE LAIKIM: Pilai spot olsem volibol, soka na basketbol, harim musik, ritim niuspepa na wok

NEM: Jamie Awe

KRISMAS: 29 (man)

ADRES: C/Hargy Oil Palms, PO Box 21 Biialla, West New Britain Provins

SAVE LAIKIM: Lukim rugby, mekim poroman wantaim ol arapela na painim wanpela lotu meri bilong maritim

NEM: Atasing Bafike

KRISMAS: 27 (man)

ADRES: Bumbum Primary School, PO Box 4588, Morobe Provins

SAVE LAIKIM: Harim musik, pilai soka, wat-sim TV na pilai kompyuta gem

# Nu Silan laik strongim wok bisnis wantaim PNG



Nu Silan Hai Komisina, Marion Crawshaw

**Veronica Hatutasi i raitim**

NU SILAN i lukluk long strongim wok bisnis na tred o baim na salim ol samting namel long tupela kantri, Hai Komisina, Marion Crawshaw, i tok.

Mis Crawshaw i tok PNG na Nu Silan i gat strongpela na gutpela wok pren namel long ol pinis na nau, tupela i mas strongim wok ikononi namel long ol.

“Wok long politikel level namel long tupela kantri i strongpela na long level bilong pipel. Nau mipela i wok long strongim wok bisnis na ikononi namel long PNG na Nu Silan,” Mis Crawshaw i tok.

Mis Crawshaw i bin wokim ol dispela toktok taim em i stori wantaim Wantok las Sande long Waitangi De selebren long Nu Silan Hai Komisina graun eria.

Namel logn 150-200 Nu Silan komiyuniti na famili long Mosbi,

ol poroman na ol woklain bilong Hai Komisina i bin bung na long tingim na amamasim nesenel de bilong Nu Silan.

Long yia 1840, ol Maori sif em ol asples pipel bilong Nu Silan i bin sainim triti o agrimen wantaim ol waitman i bin go sindaun long hap, long sindaun gut olsem wanpela pipel i gat wankain rait na luksave.

Kiwi Klab i bin go pas long ol samting i bin kamap long dispela de wantaim bikpela samting em “hangi” o bikpela kaikai o mumu.

Mis Crawshaw i tok insait long Pasifik rijen, PNG em i namba tu kantri we i kisim bikpela hap AID o helpim mani i kam long NU Silan. Solomon Ailan i go pas.

Manimak long dispela helpim mani we PNG i save kisim long Nu Silan em long NZ\$30 milion o samting olsem K30 milion.

Mis Crawshaw i tok ikononi bilong PNG i wok long groa wantaim ol maining, wel na ges

projek i wok long kamap insait long kantri.

Em i tok long sait bilong maket na tred, “Nu Silan i no bikpela yet, tasol mipela i laikim bai dispela i senis n agro.

Em i tok Nu Silan i gat ol gutpela na save woklain long long PNG long sampela eria olsem mekim ol bris, rot na ol bikpela bilding, wok enjiniring, kaikai na dring, wok konsaltensi na turisim tu.

“Mi ting olsem Nu Silan i ken helpim long developim PNG wantaim ol save lain bilong mipela. Gavman bilong Nu Silan i wok long lukluk long senisim ol AID o helpim gren mani i go long developmen eria. Wanpela em long helpim long bildim ol holsel maket i kamap gutpela moa na tu, long sapatim rurel agrikalsa developmen,” Mis Crawshaw i tok.

# Nu Silan tred Misin bai kam long Epril

**Veronica Hatutasi i raitim**

WANPELA Tred Misin bilong Nu Silan bai mekim raun bilong em i kam long PNG long mun Epril long dispela yia, Nu Silan Hai Komisina long PNG, Marion Crawshaw i tok.

Dispela em long strongim moa na lukluk long ol nupela rot we PNG na Nu Silan i ken wok long eria bilong ikononi, tred na bisnis.

Mis Crawshaw i tok em i lukim olsem bikpela samting namel long tupela kantri we bai strongim wok pren bilong tupela em long komesel rilesensip.

“Mi lukim olsem ikononi bilong PNG i wok long groa na em i ken baim ol guts na sevis long Nu Silan. Tru, Nu Silan i liklik yet long tred na bisnis maket long PNG, mipela i laikim bai em i groa i go moa na kamap strongpela,” Mis Crawshaw i tok.

Olsem na dispela tred misin bilong ol i wanpela rot long kirapim ol wok long dispela eria i go strong moa.

Long sait bilong bailaterel (namel long tupela kantri level) tred, PNG em i namba tu bikpela maket long Pasifik rijen, bihain long Fiji na i no karamapim Australia, we Nu Silan i save salim ol samting bilong em i kam long en.

I kam inap long 2009, i bin gat 7 pesen i go antap long ol samting we PNG i save eksptim o baim long Nu Silan. Na insait long wanpela yia, PNG i save tromoim NZ\$161.80 milion long baim ol samting i kam long Nu Silan. Em ol samting olsem sipsip mit, (NZ\$29.88 m), ain na ol stil



NU SILAN BUNG: Pes bilong sampela ol Nu Silan famili long Mosbi. Foto: Veronica Hatutasi

samting (18.26), milk pauda, bata na sis (13.29), Kwiktai (10.21), Tekstail o ol klos (8.90), Ol Ain stil prodak long wokim ol haus long ol (8.75), Ol Ilektrikel prodak (7.49), Ol Treila (5.84), Ol lait ekraf (5.07), ol ais kumu (3.68) na 37.36 long ol narapela.

Long narapela sait, Nu Silan i save ol samting long mak bilong NZ\$100milion long wanpela yia. Piul o petroleum em i

stap long top lista we Nu Silan i save baim bihain long olgeta tupela yia. Kopi, timba, welpam oil na kakau em ol narapela prodak Nu Silan i save baim long PNG, tasol nau em i laik bai strongim dispela.

I gat sampela Nu Silan kampani i wok i stap long PNG i karamapim telekomyunikesen, enjiniring, bilding na konstrak-sen, edukesen na insurens.

Nu Silan –PNG Bisnis Kaunsel i gat opis long Oklen (Auckland) Nu Silan em i lukautim wok tred namel long tupela kantri. Moa long 20 bisnis i memba bilong dispela Kaunsel i karimaut ol wok bisnis long PNG. Kontek etres bilong Kaunsel em long info@nzpngbc.org.nz

Ol i lukluk nau long sanapim wankain kaunsel long Mosbi bilong lukautim ol wok long PNG.

# Manmeri kisim skul long lukautim hani bi

**Tella Loie (DAL) i raitim**

## INAP olsem 50 fama i kamap long hani bi skul long Goroka i no long taim i go pinis.

Planti bilong dispela ol fama i bilong hap bilong Goroka we sam-pela bilong ol i nupela ol fama.

Dispela skul em i kisim wanpela wik olgeta we lokol Memba, Thompson Haroquave, i spon-saim.

Tella Loie, apikalsa opisa; Isten Hailans Bikiping Asosiesen Siaman; Jonah Buka, jon kodineta; Wilson Tomato; hani bi fama Aya Sama; na Joachim Waugla bilong Dipatmen bilong Agikalsa na Laipstok (DAL) i ronim.

Wankain skul em Loie na ol memba bilong bi faming asosiesen i bin ronim long Madang na Bulolo na inap olsem 15 i go long 20 manmeri i bin kamap tasol i no moa long 50 mak olsem i bin kamap long Goroka.

Ol manmeri i lainim planti ol gutpela samting olsem wok bilong kamapim na lukautim hani bi; long ol hap i gutpela long lukautim bi; long kamapim hani; long pekim na salim; na long pasin bilong lukautim wanpela long taim bilong wok long hani bi.

Wanpela mak ol manmeri i pas na kisim pepa bilong ol em long

lukim hani bi i kaikaim wanpela hap bilong bodi bilong ol.

Dispela em long painim aut sapos ol inap long lukautim hani bi na olsem ol i no ken kisim bikpela bagarap long bihain taim sapos hani bi i kaikaim ol.

Mista Loie i tok dispela i namba wan taim wanpela Memba Isten Hailans i kisim tingting na yusim mani long kamapim skul bilong kamapim na lukautim hani bi.

Memba i bin givim wankain skul pastaim long kisim save na redim ol yet long bikpela san em ol saveman i tok bai kamap long 2012.

Loie i askim ol arapela Memba bilong Palamen long bihainim Mista Haroquave na givim mani long ol opisa i go aut na givim skul long ol manmeri.

Ol manmeri i tok amamas long Haroquave long gutpela tingting em i gat long larim ol i kisim skul bilong lukautim hani bi.

Pulex Oti biong Hegu viles, Kabiufa, i tok pasin bilong lukautim hani bi i ken fani samting tasol i gat ol salens bilong em tu.

Em i stat long lukautim hani long 2003 na nau long dispela taim i gat 40 bihaivs na i save salim hani bilong em i go long Nugini Frut Kampani bilong Goroka.

Em i tok prais bilong hani long dispela taim i sanap olsem K9 i go long K10 long wanpela kilo.

Na em i askim ol manmeri long ol i mas gat strongpela tingting long kamapim na lukautim hani bi

long wanem dispela bisnis i ken lukautim ol tu.

Long makim maus bilong ol manmeri em i tok tenkyu long Haroquave na ol manmeri husat i kamap na givim skul.

Long strongim wok bilong lukautim hani bi, memba i baim olsem 120 bi haiv, hani ekstrekt, protektiv gia (banis kolos) na planti arapela samt



LAIK SAVE: Ol hani fama bilong Goroka i bung ausait long Goroka Kaunsil Semba long taim bilong kisim skul. Poto: TELLA LOIE

# NARI skulim ol bus manmeri long lukautim pis

**Densley Tapat (NARI) i raitim**

NESENEL Agrikalsa Risets Institut (NARI) nau i lukluk long kamapim wok bilong lukautim pis long bus o kamapim ples bilong lukautim pis long sampela hap bilong kantri. Dispela tingting em gavman bilong Papua Niugini i sapotim. Inap olsem 200 manmeri i kamap long ol skul long Westen Hailans, Morobe na Is Nu Britan Provins.

Dispela trening i bilong luksave long ol manmeri husat inap long kamapim dispela wok we projek em Pablik Invesmen Program (PIP) i givim mani.

NARI i givim dispela skul long helpim ol manmeri i ken mekim wok na strongim laip bilong ol yet.

Wantaim gutpela menesmen, ol liklik wok bisnis olsem pis

fam i ken sapotim gut ol liklik komyuniti.

Long taim bilong givim skul ol manmeri i serim ol toktok na save ol i gat namel long ol yet.

Ples NARI i kamapim ol projek em long Kasapo Viles, Garasa long Garaina Distrik, Morobe Provins; Gia, Tamal, Kiripia na Alkena Viles long Loa Kagul long Tambul Nebilyer Distrik, Westen Hailans Provins; Vairiki1, Tagitagi 2, Toma, Vunadirdir long Gazelle Distrik na Lausus Viles long Melkoi LLG long Pomio long Is Nu Briten Provins.

Ol trening long loa Kagul i kisim olsem tripela de we inap olsem 90 manmeri i kamap, Gia i bin gat 20 manmeri i kamap na Tamal Kiripia olsem 50 manmeri Tamal Kiripia na 20 long Alkena.

Long Garaina, inap olsem 49 man-

meri i kamap we 9-pela em ol meri na long Pomio, inap olsem 60 manmeri i kamap we 10-pela em ol meri.

Trening i lukluk long hevi bilong ol fama tu long wanem samting ol i mas mekim long em.

Bikpela hevi em long kain kaikai em ol manmeri i mas givim long ol pis.

Na i nogat inap ol skul toktok long tokim ol manmeri long wanem samting ol i mas mekim long kamapim kaikai na givim long ol pis long kaikai.

Ol fama i yusim tu ol kain kaikai we i no gutpela long ol pis na dispela i pasim gutpela kamap bilong pis fam.

Dispela projek i wanpela bilong ol projek we PIP i helpim na givim mani arere long ol arapela projek olsem pis mil, milran, rais bren, kopra mil na ol agrikalsa bai prodak.

# Ol Wantoat laikim rot long kamap long Lae pis maket

**Suzie Gebo (NARI) i raitim**

OL manmeri long Wantoat Viles long Markham, Morobe Provins i gat planti samting long salim tasol hevi bilong rot i pasim ol long salim samting.

Bikpela laik em bilong rot i go long hap bilong ol.

Wantaim ol samting ol i gat pinis long bipo i no longtaim i go pinis ol i kamapim pis faming.

Long pis fam, ol i kamapim ol bikpela pis we ol inap long salim long lokol maket na ol stua long Lae.

Nau yet ol i kamapim olsem 30 pis pon o raun wara na i wok long groim ol pis na laik bilong ol lokol manmeri long go insait long dispela wok bisnis i wok long gro moa yet.

Sais bilong ol raun wara i stap long 5 mita longpela na 5 mita bikpela na 11 mita bikpela na 45 mita longpela.

Insait long dispela ol fam i gat ol kuka na talapia na namba bilong ol pis i wok long groa bikpela na nau i stap long 2,000.

I no longtaim i go pinis bihainim askim bilong wanpela man long Wantoat ol savemanmeri bilong Nesenel Agrikalsa Risets Institut (NARI) long Labu, klostu long Lae i go long Wantoat na skulim ol manmeri long mekim pis faming.

Opisa bilong NARI i mekim dispela wokabout bihainim tu Smolholda Laivstok Developmen Projek bilong Institut we Pablik Invesmen Program (PIP) bilong Nesenel Gavman i givim mani long em.

Long wokabout ol opisa i kisim tingting na save tu long ol rot ol i ken kamapim ol pis faming long ol bus ples.

Kibung namel ol opisa na pis fama long Wantoat i kamapim ol toktok long ol rot we ol fama i ken kisim helpim na skruim wok bilong ol.

Long dispela ol i painim olsem i gat laik long kamapim pis faming tasol nogat inap save long ol rot bilong kamapim kain wok olsem.

Wantaim dispela ol pis fama i tokaut olsem i nogat gutpela kaikai i stap bilong givim long ol pis na ol i ken stap.

Wok bilong kamapim gutpela kaikai na kamapim ol gutpela pis i givim hevi long ol fama long mekim gut wok.

Tasol long wankain taim ol fama i painim olsem i gat inap ol gutpela kaikai i stap

tasol i nogat ol kaikai bilong pis daiet olsem pis mil, milran na kopra mil i stap nau bilong helpim ol fama.

Bikos dispela ol samting i no stap em i givim pasim wok bilong kamapim gutpela ol pis bilong maket.

Narapela hevi we ol fama long Wantoat i gat em long rot ol bai yusim long go isi long ol maket na salim pis bilong ol.

I nogat gutpela kol sistem na sapos nogat rot pis ol i kisim bai bagarap bipo long ol i kamap long maket na salim long Lae o arapela ples klostu long Lae.



MEKIM WAR: Pis pon long Wantoat ples. Poto: SUZIE GEBO

**PUTIM HAN:** Wanpela pilaia bilong Defence i redi long kisim bal long sofbol gem bilong ol long Februari 6 agensim PNG Power. Power i win 1-0. *POTO: Andrew Molen.*



**HAN I SOT:** Goli bilong Uni Inter FC no bin i nap long pasim dispela gol we Jacinta Dobbin bilong Biz Print Angels i bin putim long wanpela penolti kik. UIFC i win 12-1. *POTO: Andrew Molen.*

**SALIM LONG BAKSAIT:** Hekari United straiika, Neil Hans i nogat taim long tanim olsem na em i kikim bal tasol long bak-sait bilong lek bilong em long NSL gem bilong ol agensim Eastern Stars long Mosbi. Hekari win 2-1. *POTO: Andrew Molen*



**TOKSAVE:** Salim ol spots dro bilong yu kam long Feks; 325 2579, e-mel;[amolen@wantok.com.pg](mailto:amolen@wantok.com.pg) o kam lusim long Wantok Niuspepa opis long Central Waigani, NCD.

**KISIM:** Gol Atek (GA) bilong NFA i kalap na kisim bal bipo long ol birua bilong em bilong OC i pasim em long Pablik sevens netbol resis bilong ol las wik Sarere long Mosbi. *POTO: Andrew Molen.*

netball



## NETBOL

**PILAI GRAUN:**  
Piksa i soim netbol kot na ples bilong ol pilaia long sanap.



**KEPTEN:**  
Mona-Lisa Leka em bipo kepten bilong PNG. Em tu i pinis pilai long 2010.

POTO: Team PNG/PNGSFOC.

**SINIA:** Ravu Raula em wanpela sinia pilaia bilong

Pepes husat i pinis pilai long 2010.

POTO: Team PNG/PNGSFOC.



**YUNIFOM:** Ol netbol yunifom i nogat namba tasol i save gat ol let i soim posisen bilong wanwan pilaia.



**TANIM:** Lua Mavara em wanpela namba wan gol suta (GS) bilong PNG. POTO: Team PNG/PNGSFOC.



# Gem bilong ol meri

### Save Long Gem

I NOGAT planti gem i stap we ol man yet i save pilai o ol meri yet i save pilai.

Planti gem nau em ol man na meri wantaim i save pilaim.

Tasol i gat wanpela gem i stap we, long Papua Niugini, em nogat man i save pilai bilong wanem ol i tok em i gem bilong ol meri stret na ol tasol i save pilai.

Dispela spot em netbol (netball).

### Histri bilong gem

Netbol i stat wanpela yia bihain long basketbol, long Amerika.

Tasol netbol i no kisim nem na stail bilong en long pilai inap em i go kamap long Inglen (England) long 1893.

James Naismith, wanpela man Kanada (Canada) husat i bin wok long Amerika, i bin kamapim basketbol long 1891.

Wanpela yia bihain, Senda Berenson, wanpela tisa long kolis bilong ol meri long Amerika i kamapim basketbol bilong ol meri.

Ol stail na loa bilong pilai gem bilong meri no wankain olsem bilong ol man.

Berenson i senisim sampela ol stail na loa bilong gem long bihainim pasin na bilas bilong ol meri long dispela taim.

I nogat planti kontek o bam namel long ol pilaia na ol i no werim ol yunifom (sotpela trasis) olsem ol man.

Basketbol bilong ol meri suruk i go olgeta hap long Amerika, wankain olsem gem bilong ol man.

Long wanem ples em i go, ol i senisim wanwan loa na stail bilong pilaim gem.

Basketbol bilong ol meri go long Inglen long 1893 na Martina Bergman-Osterberg bilong Physical Training College long London, i skulim ol meri sumatin bilong em long narapela stail bilong pilai dispela gem.

Sampela moa senis i kamap long gem long dispela skul tu-pela yia bihain.

Long 1897, ol i kisim sampela nupela loa na stail bilong pilai basketbol bilong ol meri kam long Amerika.

Long dispela taim tu, ol i no moa pilai insait long haus tasol,

nau ol i kisim i kam pilai long autsait tu na i senisim ol baket bilong tromoi bal i go insait wantaim ol ring.

Na Osterberg i givim nem bilong gem bilong em olsem "netbol."

Bihain, basketbol bilong ol meri senis i go kamap olsem gem bilong ol man gen tasol netbol i stap wankain na i go long ol arapela komonwel kantri long wol tu.

Netbol i kamap bikpela namel long ol meri long ol komonwelt kantri na i kam long Australia long stat bilong 1900's na i go long Nu Silan long 1906.

Namba wan intanesenel netbol tonamen i bin kamap long Eastbourne, Inglen long 1963.

Ol i bin kolim Wol tonamen tasol nau i senis i go long Netbol Wol Sempionsip.

Nau i gat planti ol intanesenel tonamen na tes namel long ol kantri save kamap.

Netbol i kisim luksave bilong Olimpik gems long 1995 tasol ol i no save pilaim yet.

Namba wan taim bilong en long kamap long komonwelt gems em long Kuala Lumpur long 1998.

### Ol loa na stail bilong pilai

Astingting bilong pilai netbol, em bilong wanpela tim long traime na kisim bal long hapsait long kot bilong ol i go long narapela sait kot bilong narapela tim.

Wanpela tim bai traime long pasim narapela tim na tu traime long rausim bal long ol na skoa tu.

I gat 7-pela pilaia long wanpela tim na tupela tim i save pilai insait long wanpela gem.

Ol pilaia i no save werim namba long yunifom bilong ol tasol i save gat ol leta we i makim posisen bilong wanwan pilaia.



Em i klostu wankain olsem basketbol tasol ol pilaia i no save tromoi bal i go daun long graun na kisim bak olsem basketbol.

Ol i save holim long antap tasol na tromoi go long narapela pilaia.

I tambu long wanpela pilaia bilong narapela tim i sanap klotu na holim bal bilong narapela tim pilaia taim em i sanap o i laik putim gol.

I save gat tupela ampaia i lukautim gem na ol i save pilaia 4-pela kwata long wanpela gem.

Wanpela kwata em 15 minits.

### Netbol long PNG

Long PNG, netbol i save kamap strong long NCD na Sentral provins na tu long Morobe, Madang, Isten Hailans na Milen Be tasol i no tumas long ol arapela provins.

Em i kamap long PNG long wankain taim olsem basketbol, namel long '70's na '80's.

PNG Netball Federation i lukautim gem long PNG.

Netbol i save kamap strong namel long ol meri na nesenel tim bilong PNG em "Pepes" (bataflai, long tok motu).

Ol i save makim kantri long Pasifik gems, komonwelt gems na planti arapela intanesenel gem long PNG na ovasis.

Sampela ol sinia pilaia bilong PNG em Mona-Lisa Leka, Lua Mavara, Tiata Baldwin, Geua na Ravu Raula na ol arapela.

Netbol i wanpela gutpela gem bilong ol meri bilong wanem ol yet i save pilaia dispela gem na em i mekim ol i save pilim strong na amamas long pilai na sapotim ol yet.

PNG gat sans long kamap wanpela strongpela kantri long Pasifik na wol sapos dispela gem i ken go long planti ol arapela provins tu.

I mas i gat gutpela wok edministresen long ronim ol gem bilong ol na tu mas i gat gutpela developmen program bilong ol yangpela pilaia na nesenel tim i mas kisim gutpela trening ples na ol samting bilong pilai long kamap gut.

# Dell brukim rekot gen

SALOME Dell i brukim narapela nesanel rekot gen taim em i ron long 1, 500 mita resis long Brisbane Track Classic, las wik.

Em i rausim olupela rekot bilong em yet wantaim 4 minit na 27.77 sekens.

Dispela em i namba wan resis bilong dispela tonamen we i gat narapela 5-pela resis bilong em i stap yet na Dell i statim gut yia bilong em wantaim dispela gutpela ron.

Dispela tonamen em i hap bilong tua bilong Athletics Australia bilong 2011 sisen na ol i putim Dell long namba 7 ples namel long ol arapela gutpela etlit bilong ol.

Long wankain taim, Toea Wisil i statim gut yia bilong em tu wantaim 11.80 sekens long 100 mita na 23.96 sekens long 200 mita resis.

Long ol man, Nelson Stone i stopim taim long 48.66 sekens long 400 mita resis bilong em.

Tripela bai go long Hobart dispela Sarere long namba tu resis insait long dispela tonamen.

Long hap bai Dell i ron long 800m we em i save laikim na Stone bai ron long 200m.

Athletics Australia i lukautim wok-about bilong tripela long dispela ol tonamen na ol bai gat sans long resis wantaim ol nambawan etlit bilong Australia.

Dispela bai givim ol moa salens na i helpim long strongim ron na save bilong ol tu long ron agensim dispela ol etlit.

Dell, Wisil na Stone i mas ron strong long dispela resis bai ol i ken winim ples long go resis narapela tripela resis i kam bihain.

Bihain long Hobart bai ol arapela resis bilong dispela tonamen i kamap long Sidni, Melbourne na Perth long mun i kam.



**REKOT RON:** Dell i brukim nesanel rekot bilong em yet long 1, 500m resis las wik long Brisbane. WANTOK POTO.



**PINIS:** Ronaldo i pinis long pilai.

## Ronaldo pinis pilai

BIKNEM soka pilaia bilong Brazil, Ronaldo i tokaut long Mande nait dispela wik olsem em i pinis long pilai nau.

Ronaldo, 34 krismas, husat i winim "FIFA World Player of the Year" awod tripela taim pinis, i bin wari tru taim em i tok aut long ol niusmanmeri long Sao Paulo long pinis bilong em.

"Mi gat gutpela taim long pilai tasol mi kisim planti bagarap long tupela lek wantaim na i mekim mi tingting long laip bilong mi long bihain taim," Ronaldo i tok.

Em i mekim histri long 2002 taim em i pilai wantaim bagarap long helpim tim kantri bilong em i winim wol kap taim em i putim tupela gol long i winim Germany 2-0 long failol.



**NUPELA SIOT:** Ol ofisol bilong PNGSFOC na Trukai Industries i soim Fan Ran siot bilong dispela yia. POTO: Andrew Molen.

## Moa siot dispela yia

PLANTI moa manmeri bai gat sans long helpim nesanel tim bilong ol dispela yia taim ol i stap insait long Trukai Fan Ran pilai.

Dispela em bilong wanem Trukai givim 90, 000 siot bilong pilai dispela yia we i moa long mak bilong las yia we i klostu long 80, 000.

Las yia ol i salim 25, 000 siot long ol sponso long Lae na Mosbi na dispela yia, ol i lukluk long salim planti moa bilong wanem ol i lukluk long kisim i go long Lihir, Kavieng, Goroka, Hagen, Bialla, Kimbe na Kokopo.

Siaman bilong fanresing na sponsasip bilong PNG Sports Federesen na Olimpik Komiti, Syd Yates i tok amamas long helpim bilong Trukai dispela yia gen.

"2011 i makim namba 12 yia bilong Trukai Industries Ltd olsem mama sponso bilong dispela Fan Ran na mipela i tok amamas long gutpela sapot bilong ol long ol dispela yia," Yates i tok.

Fan Ran bilong dispela yia bai lukluk long bungim mani bilong salim PNG tim i go long Pasifik Gems long Nu Kaledonia long Ogas na Septemba.

Long wankain taim bai planti ol skul i kisim helpim tu taim ol i salim ol siot long ol sumatin bilong ol.



**RAUSIM TRASIS:** Thurston (Iephan) na Lockyer i senisim trasis bilong ol tim bilong ol bihain long gem. POTO: AAP Image.

## NRL All Stars bekim dinau

OL Indigenous All Stars i bin winim namba wan All Stars gem las yia tasol las wik, NRL All Stars i bekim dispela dinau taim ol i win 28-12 long Skilled Park long Gol Kos (Gold Coast).

Las yia, taim dispela gem i kamap namba wan taim tru, ol Indigenous All Stars i win 16-12 tasol tim bilong Lockyer i kam bek strong dispela yia na stopim ol long win gen.

Ol NRL All Stars i statim gem hariap na i no westim taim long kisim ol poin hariap.

Long hap taim, NRL i go pas 22-6 we i lukim Brett Morris, Paul Gallen, Shaun Kenny-Dowall na Akuila Uate i skoa bilong ol.

Canterbury Bulldogs fulbek, Ben Barba, i skoa bilong ol Indigenous tim long hap taim stret taim em i kisim wanpela bal i kam long kik bilong hap bek, Jonathan Thurston.

Indigenous tim husat ol i bin gat strongpela difens las yia i no bin inap long sanapim wanpela banis gen las wik.

Tasol ol Indigenous i kam bek strong long namba tu hap bilong hap taim na i bin pasim gut ol NRL long skoa gen.

Strongpela gem bilong ol i lukim Souths winga, Nathan Merrit, i skoa bilong ol long kona long kisim ol i go klostu 22-12.

Dispela i kirapim tim na tu ol sapota bilong ol Indigenous tim tasol wanpela gutpela trai bilong Canberra fulbek, Josh Dugan i pasim dua long ol taim em i ron 40 mita long kisim skoa i go 28-12 long fultaim.

Thurston i tok ol i no amamas long dispela lus tasol ol yet i givim planti bal tumas i go long ol NRL tim.

"Ol i gat planti gutpela pilaia tumas long winim gem," em i tok.

Huka bilong NRL, Cameron Smith i tok em i ting ol Indigenous bai mekim olsem las yia taim ol i kam bek strong long namba tu hap bilong gem.

Long wankain taim, NRL kosa, Wayne Bennett i bilip dispela gem bai go bikpela yet long ol yia i kam.

Inap long 25, 000 manmeri kamap long lukim gem las wik Sarere na Bennett i bilip planti moa bai kam sapos ol i kisim gem i go long wanpela bikpela moa pilai graun.

Em i tupela yia nau bilong dispela gem na em i wok long kamap long Skilled Park tasol.

Long 2012 bai em i kamap gen long hap bilong wanem i gat wanpela kontrak i stap long gem bai kamap long hap inap tripela yia bipo ol i sainim gen o kisim i go long narapela hap.

"Mi ting em bai go bikpela moa sapos yumi kisim i go long ol bikpela stedium," Bennett i tok.

"Mi laikim dispela gem na mi bin laik kos long wanpela tim.

"Mi no bin aplai long kamap kosa tasol ol yet i ringim mi na askim sapos mi laik mekim na mi amamas long kam kos bilong wanem mi bilip long wanem samting mipela i mekim long hia," em i tok.

Bernard i amamas long lukim planti ol yangpela asples pilaia bilong Australia i kisim gutpela helpim na luksave long NRL na ol arapela sinia pilaia i helpim ol aninit long dispela program bilong All Stars

# Knights bagarapim Fiji 72-0

Ol Newcastle Knights i mekim save long ol Fiji Bati las wik Sande nait taim ol i winim ol 72-0 long Newcastle.

Dispela i bin namba wan taim bilong 14 pilaia insait long dispela Fiji tim long kam pilai autsait long kantri bilong ol.

Ol Knights i no givim sans long ol na i putim 14 trai long statim yia bilong ol long gutpela mak.

Klostu long 3, 000 manmeri kamap long lukim dispela gem we 12-pela pilaia bilong ol Knights i skoa bilong tim bilong ol.

Peter Mata'utia na Josh Ailaomai wanwan i putim tupela trai namel



**KAMAP:** Mata'utia i putim tupela trai na kikim tripela gol insait long win bilong Knights agensim Fiji las wik.

long ol dispela 12-pela trai bilong ol Knights na Mata'utia i kikim tripela gol tu.

Luk olsem Knights kosa, Rick Stone bai kisim sampela ol sinia pilaia bilong em i kam

bek insait long tim long pilai agensim Penrith

Panthers dispela Sarere nait long trail gem bilong ol long Port Macquarie.

I gat bilip olsem bipo St George Illawarra fowet, Neville Costigan tu bai pilaim namba wan

gem bilong em wantaim ol Knights long dispela taim.

## Lyon, Rodney na Stewart bai no inap pilai

JAMIE Lyon, Shane Rodney na Brett Stewart bai no inap stap insait long Manly tim we bai pilaim wanpela trail gem agensim ol Warriors long Nu Silan long Februari 26.

Dispela tripela man i gat liklik bagarap na Manly i tok olsem ol bai no inap yusim ol long dispela gem bilong wanem ol i pret long nogut ol i bagarapim ol moa yet.

Lyon, husat i kisim

bagarap skru bilong fut bilong em las wik Sarere nait long All Stars gem i go lukim ol dokta long Trinde dispela wik.

Tim bilong em i tok ol bai givim em gutpela malolo bai em i redi gut long kam bek long namba wan gem bilong ol long stat bilong NRL sisen long Melbourne long Mas 12 agensim ol Storm.

Manly kosa, Des Hasler, i tok Lyon bai pilai

long namba wan gem bilong ol.

Rodney na Stuart wantaim i bin kisim bagarap long lek skru bilong ol na i wok long redi long kam bek dispela yia.

Bagarap bilong tupela i lukim ol i no pilai long 2010 sisen.

Hasler i bilip tupela bai redi long pilai agensim Melbourne tasol em i no ting ol bai orait yet long bungim ol Warriors.



Winim NRL Jesi olgeta wik wantaim



Baim TURBO na go insiat long Dro

\*1290\*1\*Turbo amount#

TURBO K5, K10, K20 & K40 available

Ringim Customer Care on 1551 long moa toksave

bemobile mipela bilong yu

Kompatisen bai pinis long 05th March 2011

Terms & Condition Apply  
Jerseys Subject to availability



# Goroka redi long fainol seleksyen bilong Lahanis

## Sape Metta i raitim

OL sapota bilong ragbi lig long Goroka bai ken lukim wanpela bikpela seriti (charity) pilai dispela Sande namel long 2010 PNG NRL sempion, Bintangor Lahanis na Lahanis tim 2.

Dispela pilai bai kamap long Nesenel Spots Institut (NSI) pilai graun.

Deputi Siaman bilong Lahanis bod, Himony Lapiso, i tok olsem pilai bai go het olsem seriti pilai tasol long wankain taim bai ol selekta i lukluk long makim fainol tim bilong Lahanis bilong dispela yia.

Em i tok, Lahanis tim Tu (2) i makim pinis 17 ol pilaia bilong Goroka na Kainantu taim ol i bin stap insait long tripela trail gem we i kamap tupela wik i go pinis long Goroka yet.

Insait long dispela tim, ol i

makim 5-pela pilaia bilong Kainantu na ol arapela i kam long Goroka.

Dispela ol pilaia em; Maya Siove, Willy John, Dickson Pitu, Michael Robert, Marcus Himone (Kainantu), Gonsella Urakusie, Pasu Avanie, Kingsley Jaggie, Gerry Gena, Cliffy Apo na Damien bage (Goroka).

Dispela ol pilaia i wok long paitim dua bilong ol selekta olsem ol i gat save na stail tu bilong pilai na i ken kamap olsem ol arapela sinia pilaia husat i save makim ol ples na kantri bilong ol bilong wanem ol tu i mekim wankain taim ol i stap insait long dispela ol trail gem tupela wik i go pinis.

Nau ol i stap redi long soim strong na save bilong ol long dispela bikpela gem na traim long kisim ples insait long fainol Lahanis tim bilong dispela yia.

Ol i gat sans long go insait sapos ol Lahanis pilaia nau i lusim tim long go skul, wok, i kisim bagarap o i lusim fom na i no pilai gut tumas.

Tasol ol pilaia long tupela tim wantaim i mas pilai strong dispela wiken, sapos nogat bai ol selekta i no inap kisim ol i go insait long tim.

Sampela ol Lahanis pilaia nau olsem kepten, Glen Nami, John Milba, Yapa Kapu, Nickol Ubile, Tony Dai, Thomson Tete, Chris Hogi, Walter Hasu, Willie Limu, George Abba, Adex Wera na Minaho Goso bai pilai strong yet long go insait long tim olsem na em bai no wanpela isi gem bilong ol yangpela pilaia.

"I tru olsem em i seriti pilaia tasol em salens bilong ol nambawan pilaia tasol bilong Goroka.

"Na mipela i amamas long kamapim dispela pilai long wanem em bai givim mipela sans tu long makim ol nambawan pilaia bilong Lahanis tim," Lapiso i tok.

Em i tok, long wankain taim bai ol i bungim mani long helpim ol arapela manmeri i bungim sampela kain hevi nau.

"Mipela bai sasim liklik fi long get, K3 long ol bikpela manmeri na K2 long ol pikinini," Lapiso i tok.

Em i tok, olgeta mani ol i kisim long dispela gem bai go long PNG Red Cross husat ol bai givim i go long ol lain i kisim bagarap long bikpela tait wara long Kwinslen, Australia dispela yia.

Lahanis tim 2 em; Brian Namson, Dickson Pitu, Kingsley Jaggie, Willy John, Kenneth David, Pasu Avani, Maya

Siove, Wesley Mohukule, Garry Gena, Gonsella Urakusie, Cliffy Apo, Damien Bage, Michael Robert, Jasper Philip, Shedrick Singip, Johnson Wei, Marcus Himone na Kumuno Maima.

Bintangor Lahanis tim 1 em; Alex Wera, Minaho Goso, Thomson Tete, Chris Hogi, Spiro Mikaive, Joseph Peter, Walter Hasu, Willie Limu, John Milba, Yapa Kapu, Tony Dai, Nickol Ubile, Bernard Wallock, Glen Nami (kepten), Casey Frank, Elvis Dick, George Abba na Kuta Lomutopa.

I gat sampela toktok olsem bai gat ol trail gem namel long ol Lahanis, Simbu Warriors na Lae Snax Tigers.

Dispela em ol seriti pilai tu we bai kamap long Goroka sampela taim long pinis bilong mun Epril bipo long PNG NRL pilai i kik ov long Mei.

## Farina kam bek long ples

### ■ ikam long pes 28

Farina i gat planti ekspirians olsem bipo pilaia na kosa bilong Australia na mipela i amamas long makim em olsem kosa bilong PNG tim," Presiden bilong PNGFA, David Chung i tok.

Farina i tok PNG i no stap long insait long planti ol intanesenel gem tasol em i bilip i gat planti ol gutpela pilaia i stap husat inap kamap na apim nem bilong kantri.

"Mi no save gut tumas long gem bilong PNG tim na mi save i gat ol gutpela pilaia i stap long hia.

"Wok bilong mipela nau em bai long luksave long dispela ol pilaia na trenim ol long skoaim ol gol," Farina i tok.

"Astringting bilong soka em long skoaim ol gol, yu ken i gat ol gutpela pilaia tasol sapos ol i no inap long putim gol em bai tim bilong yu i painim hat olsem na mipela bai lukluk long dispela," em i tok.

Farina i tok ol bai no inap lukluk long ol arapela bikpela tonamen olsem wol kap na ol arapela yet tasol bikpela tingting nau em long developmen na tu long mekim gut long Pasifik gems.

"Mipela i lukluk long pinis insait long top tri ples bilong wanem dispela bai givim sans long go insait long Osenia salens bilong kwalifai long 2014 wol kap," Chung i tok.

"Mi bai wokhat long helpim PNG kamap wanpela strong tim insait long dispela Pasifik gems," Farina i tok. Wokman bilong Osenia long

PNGFA, David Brand, i tok ol i lukluk long Farina long helpim PNG tim i apim gem bilong ol.

Las wik Sarere, Farina i bin go lukim raun 11 NSL gem long Mosbi namel long Hekari United na Eastern Stars.

Em i bungim ol pilaia na lukim gem long kisim sampela tingting long wanem kain samting em i ken mekim long stretim gem bilong ol PNG pilaia husat bai stap insait long skwat dispela yia.

Farina i no bin wok olsem kosa bihain long Brisbane Roar, tim bilong Australia insait long A-Lig resis i rausim em long 2009 bihain long ol polis i bin sasim em long dring na draivim kar.

Farina i bin straika bilong Australia long 1982 i kam long 1996.

Em i bin kosa bilong Brisbane Strikers bilong Nesenel Soka Lig bilong Australia long 1997 i go long 1998 bihain em i lukautim Marconi Football Team bilong NSL long 1998 i go long 1999.

Long Ogas 1999 i go long Jun 2005, Farina i stap olsem het kosa bilong nesenel tim bilong Australia na tu anda 23 tim bilong Olimpik gems.

Farina i mekim histri tu olsem namba wan Australia man yet long kamap kosa bilong nesenel tim.

Em i go long Brisbane Roar long Novemba 2006 na i stap inap Oktoba 2009.

Farina i tok dispela wok wantaim PNG nau em i gutpela bilong em long mekim wok gen na tu long helpim soka long PNG.

## Digicel em nupela sponsa bilong ragbi lig

TUPELA yia i go pinis, wanpela mobail fon kamapani em i amamas sponsa bilong PNG Nesenel Ragbi Lig, nau em i lusim na birua bilong em i kisim ples.

Digicel, narapela mobail fon kampani tokaut las wik olsem em bai mama sponsa bilong nambawan gem bilong PNG long 2011 na 2012.


PNG NRL i bin sot long stat bilong dispela yia taim Bemobile i bin rausim han bilong ol olsem mama sponsa bihain long tupela yia wantaim gem.

Tasol nau Digicel i kam insait na i promis long givim bikpela gem long PNG long tupela yia i kam.

Nupela nem bilong gem nau em "Digicel Cup" na nupela sponsa i tok ol bai kamapim planti bikpela samting long apim level bilong gem.

"Aninit long dispela investimen, Digicel bai givim nambawan komyunikesen sevis i go long ol tonamen kodineta, ol tim na tu bai gat bikpela promosen kempen we bai apim tru gem," Digicel i tok long wanpela stetmen pepa.

Ol i tok ol bai lukluk tu long kisim ol nupela tim i kam in-



**BIKPELA GEM:** Digicel i promis long mekim PNG NRL i kamap bikpela na gutpela moa. WANTOK POTO.

sait long resis na tu long kisim gem i go long ol nupela ples insait long kantri.

Digicel kap dispela yia bai stat long Mei wantaim 10-pela tim, wanpela moa long las yia we i bin gat 9-pela tim tasol.

Ol bai pilai 18 raun wantaim 5-pela gem long wanwan wik. Digicel nau i kamap wanpela bikpela sponsa tru bilong ragbi lig long kantri.

"Digicel i gat bikpela tingting long spots long PNG na ragbi lig em i gem bilong ol manmeri stret," Sif Eksekutiv Opisa bilong Digicel, John Mangos i tok long wanpela stetmen pepa.

"Mipela i lukluk long wokbung wantaim bod bilong PNG NRL na tu ol tim husat i

stap insait long resis, long strongim dispela tonamen na kamapim planti moa gutpela ragbi lig pilai," em i tok.

Siaman bilong PNG NRL bod, Don Fox i tok amamas long sapot bilong Digicel.

"Sponsasip bilong Digicel em i gutpela samting tru bilong dispela tonamen, ol tim na olgeta ragbi lig sapot insait long kantri," em i tok.

"Mipela i amamas long kisim Digicel i kam insait na mipela i wet tasol long wokbung wantaim ol long kamapim gut na strongim gem bilong yumi moa yet," Fox i tok.

Ol arapela sponsa olsem SP Brewery na Telikom bai stap yet long sapotim Digicel.



# SPOOTS



Isu 1904

Wan wik: Fonde, Februeri 17 - 23, 2011.

**Besta** *Tuna em tasol, em best ya!*

**IMPROVED**

**Besta** *FINEST QUALITY*  
**IMPROVED Tuna Flakes**  
IN OIL


**Besta** *FINEST QUALITY*  
**IMPROVED Tuna Flakes**  
IN OIL

**NUTRITION**

Energy	400
Protein	20
Carbohydrate	10
Fat	10

## Bipo Australia kosa bai lukautim PNG tim

**KOSA:** Farina i bungim ol Stars na Hekari pilaia las wik Sarere long Mosbi bipo long gem.



# Farina kam bek long ples

Andrew Molen i raitim

LASPELA taim Frank Farina i bin pas wantaim Papua Niugini, em taim em i bin gat tupela krismas tasol na i kam stap long Mosbi wantaim papa na mama bilong em.

Em i bin go bek long Australia wantaim famili bilong em bipo long PNG i kisim independens long 1975 tasol i save tingim yet na stori olsem em i bin stap long PNG bipo.

Nau, Farina, 46 krismas bai stap

wantaim PNG gen bihain long PNG Football Association (PNGFA) i makim em olsem nesenel kosa bilong tim bilong ol man long hia.

PNGFA i givim wok long Farina long lukautim PNG tim long Pasifik Gems long Nu Kaledonia dispela yia long Ogas 27 i go long Septemba 10.

Farina bai wok 12-pela wik wantaim PNG tim tasol i gat planti amamas namel long ol pilaia, ofisol na sapota bilong PNG long em.

*Moa long Pes 27.*

POTO: ANDREW MOLEN.

## Johnston's Pharmacies

**For First Aid Kits. Red8 Body Bulk Protein Supplements. Thompson Vitamins, Bandages, Strapping Tape, Mouth Guards.**

### All Sport and First Aid requirements.



**P.O.Box 1066 Boroko.**  
**Phone 325 3185. Fax 325 0190.**  
**Email sales@johnstons.com.pg."**